

## **Xroon tsikjin ndo Pablo xruen en ndo sen ste tjajna Roma**

*Ndo Pablo ikjin ndo xroon kuayé e sen tjajna  
Roma*

<sup>1</sup> Jan an, Pablo, nta a xrée ndo Jesucristo ikjin xroon ji i. Ndo Dio kuinchena ndo jan an ixi sinta a xrée ndo, ixi tsjako chijni jian, chijni tsingijna chujni tsechón nã kain nchakon.

<sup>2</sup> Jaña tsindachro ndo Dio tson en ixi jaña jitaxin xroon tsinichjixin sen kuachronga chijnie ndo ó sa ó.

<sup>3</sup> Chijni ji in tikinixin en Ncháina Jesucristo Chjen en ndo Dio. Je e ndo ikjan ndo chujni ko kuachrenixin ndo sen kuachrenixin ndo rey David.

<sup>4</sup> Ko juachaxin ijié chónnda Espíritue ndo Dio juinchexechón ndo Jesucristo ti kuen en ndo me e juako ixi nduaxin ndo Jesucristo, Chjen en ndo Dio.

<sup>5</sup> Ixi ndo Jesucristo me e kuaye ena juachaxin ixi sintu una xrée ndo, xronichjana chijnie ndo ngajin kain chujni chúxin a ndo, chujni ste nchijíi nunte xasintajni, ixi tsitikaon nã ndo ko xrochuntia nã ndo.

<sup>6</sup> Ko ja anta ni ste tjajna Roma, ndo Dio kuincha anta ndo ixi tsitikaonnta ndo Jesucristo.

<sup>7</sup> Méxin, ikjin xroon ji i xruan annta kainnta xro stenta tjajna Roma. Ndo Dio tjua anta ndo ko je e ndo kuincha anta ndo ixi xrokjannta chjen en

ndo. Ndotáina Dio ko Ncháina Jesucristo sintan-  
chaonnta ndo ko xrotjáanta ndo juaxruxin.

*Ndo Pablo tjaun ndo itsji ndo tsitsje e ndo sen  
tjajna Roma*

<sup>8</sup> Sa ó tajon juasaya\* ngajin ndo Dio ixi juachax-  
ien ndo Jesucristo ixi kain ja anta ko ixi nguixin  
no nichja na jian ixi ja anta tsango chuntianta ndo  
Dio.

<sup>9</sup> Jan an nta a xrée ndo Dio, ixi nchijí aséenna, ko  
nichja chijnie Chjen en ndo, ko Ndo Dio jian no e  
ndo ixi kain nchakon tjancha a ndo ixi ja anta.

<sup>10</sup> Ko kaxon kain nchakon tjancha a ndo tsajon  
ndo juachaxin ixi chao tsjasotsja anta.

<sup>11</sup> Tja on tsikonnta ko jaña tsingijnanta ixi jian  
xroxraxaonnta ko chao tsosojinta ko jaña ícha tsi-  
tikaonnta ndo Dio.

<sup>12</sup> Jaña tsingijna kichuuna ko juaxruxin tsojuna  
ixi naxraje o chuntiana Ncháina Jesucristo.

<sup>13</sup> \*Kichuuna, tja on tsono anta ixi ó chónnda itsjé  
nchakon tja on xrojuasótsja anta ko xrajua i tjaso.  
Tja on tsjaso xronichja chijni jian ngajin chujni ixi  
tsitikaon na ndo Jesús xranchi kuanichja ikaxin  
tjajna ti xrachuxin a na ndo.

<sup>14</sup> Xrokonda sintakuan an ngajin kain na, á ni  
griego o á ni je a griego, á ni no e o á ni noe a.

<sup>15</sup> Méxin, tsango tja on tsjaso tjajna Roma ixi  
sintakuan annta chijni jian, chijni xrotjáanta  
juachaxin tsarichonnta kain nchakon.

*Juachaxin chónnda chijni jian*

---

\* **1:8 juasaya** respeto, honor    **1:13** Hch. 19:21.

16 \*Jan an tosuana i nichja chijnie ndo Dio ixi chijni ji i chóna juachaxien ndo, ixi kain ni tsin en ko tsitikaon, ni me e tsechón n̄a kain nchakon, sa ó ni judío ko kaxon ni je a judío.

17 Ixi chijnie ndo Dio tjakoina xranchi tso mé e jéina ixi jaina chuntiana ndo Jesucristo. Xranchi ndachro xroon chijnie ndo Dio: “Ngisen chuntia chijnie ndo Dio tsechón sen kain nchakon.”

### *Kainna chondana ijie*

18 Ndo Dio jii ngajni tsango toña o ndo ngajin ni ña i ko ni ndako a nche e, ko kondeexin ti ndako a nche e n̄a me e tingakon en ixi ikaxin chujni tsono e chijni nduaxin.

19 Je e n̄a ó no e n̄a jian ixi chao xrochúxini ndo Dio ixi je e ndo juako ndo ngajin n̄a juachaxien ndo ixi juinchéña ndo kain nge e ngata a nunte xasintajni.

20 Maski tikon ana ndo Dio, noina ixi je e ndo juinchéña ndo kain nge e ko tikonna kain juachaxien ndo, méxin chao tsichuxinna ndo. Ko ni ndako a nche e jua i xrondachro n̄a noe a n̄a nge e nche e n̄a ixi je e n̄a tikonna kain ji i kaxon.

21 \*Maski no e n̄a jii ndo Dio, chónde a n̄a ndo juasaya xranchi tikinixin en tsayé e ndo; je o xraxaon n̄a sinche e n̄a nge e ndako a ko tsikoncha aséen n̄a ko ndako a xraxaon n̄a.

22 Je e n̄a xraxaon n̄a ixi no e n̄a kain nge e ko nduaxin a; xro an nge e no e n̄a.

23 Xrokuajon n̄a juasaya ngajin ndo Dio, ndo ícha tituan an, ndo jichón kain nchakon, ko nche a n̄a jaña. Je o tajon n̄a juasaya ngajin nge e jichón a

xranchi naa ngisen tsiken en o xranchi kuxe tjanga, ko iko chónnda noó tutée ko kaxon kunchee.

<sup>24</sup> Méxin, ndo Dio kuintu e ndo n̄a sinche e n̄a nge e ndako a tjaun n̄a, ti je o chónnda kichuu n̄a xranchi xi ko xi, ko nchri ko nchri, me e nche e nge e tosuexinni.

<sup>25</sup> Kuitikaon a n̄a ndo Dio, ndo nduaxin jichón, ko kuitikaon n̄a juancheya; kuajonna juasaya ngajin nge e tsijinchéña ndo Dio ko kuajon a n̄a juasaya ngajin je e ndo, ndo juinchéña kain nge e. Je e ndo tikinixin en ndo juasaya kain nchakon. Jaña tson en.

<sup>26</sup> Méxin, ndo Dio kuintu e ndo n̄a sinche e n̄a nge e ndako a ti tosuexinni, xranchi nchri ko nchri je o nchra chónnda kichuu nchra, ko ji in tjaun a ndo Dio xrokon en.

<sup>27</sup> Kaxon jaña xi chónnda i nchri ixi je o xi ko xi chónnda kichuu xa, me e naa nge e tosuexinni ko kondeexin me e tangi ichin xrotsé xa.

<sup>28</sup> Ko je e n̄a xraxaon a n̄a ndo Dio, méxin je e ndo kuintu e ndo n̄a xraxaon n̄a kain nge e ti ndako a ko sinche e n̄a ti ndako a xraxaon n̄a.

<sup>29</sup> Kueya ti ndako a nche e ni me e. Je o nge e ndako a nche e n̄a; tjaun n̄a xrochónnda n̄a inaa nchri, nchri je a janchri e n̄a, ko tsango ña i n̄a, ko tjaun n̄a je o xrochónnda n̄a itsjé nge e, ko méxin chónnda n̄a ijie, ko tsango chjuye e n̄a, ko tjaun n̄a naatsóñaxón n̄a chujni, ko je e n̄a ncheketo kichuu n̄a, ko ncheya n̄a ko nichja n̄a nge e nduaxin a ixi inaa chujni.

<sup>30</sup> Nichjangí e kichuu n̄a ko ningakon en n̄a ndo Dio, ko je o n̄a tjaun n̄a tsituan an n̄a, ko nchejié aséen n̄a, ko xraxaon n̄a ixi tsango tjintee n̄a,

je o xraxaon n̄a xranchi sinche e n̄a ti ndako a ko titikaon a n̄a ndotée n̄a ko janée n̄a.

<sup>31</sup> Tjaun a n̄a tsienxin n̄a ko nche a n̄a ti ndachro n̄a xrojuinche e n̄a, ko tjue a kichuu n̄a, ko tjaun a n̄a xrotjáñe e n̄a nge e juinchekao kichuu n̄a, ko tikonóe a kichuu n̄a.

<sup>32</sup> Ni me e no e n̄a nge e tsiketuan an ndo Dio ko no e n̄a ixi ngisen jaña sinche e tikinixin tsen en, ko maski jaña no e n̄a, xranche e n̄a kain me e ko xratake e n̄a juaxruxin ti tikon n̄a inaa ngisen naxraje o jaña nche e.

## 2

### *Ndo Dio jian nchéña ndo ijie ngajin chujni*

<sup>1</sup> \*Nchakon tsjankata anta ijie ngajin inaa chujni, ja onta tsamanta ijie ixi kaxon ja anta nche enta ti ndako a.

<sup>2</sup> Ó noina ixi nchakon ndo Dio nchéña ndo ijie ngajin ngisen sínká naa nge e, ixi ti nduaxin nchéña ndo ijie.

<sup>3</sup> Ko ja anta, ti tsjankata anta ijie ngajin ikaxin chujni, ¿á xraxaonnta chao rinche enta siá naxraje o ndako a nche enta?, ko, ¿á ndo Dio xro an ijie sinchéña ndo ngajinnta? Ja anta jua i satsinge enta ndo.

<sup>4</sup> ¿Á xraxaonnta ixi xro an tjintee ti ndo Dio tsango jian ndo ko taka i toña o ndo ngajinnta? ¿Á noa inta ixi ti jian nche e ndo ngajin chujni, ji i nche e ndo ixi tsitikaonnta ndo ko tsintu enta ti ndako a?

<sup>5</sup> Ko siá rinche enta ti ndako a ko nchenie a asáanta ja onta ritamanta ixi ícha tangi

tsintekon annta. Tsii nchakon ndo Dio sinchéña ndo ije ngajin kain chujni ko je e ndo tsango tsoñao ndo ko tangi tson annta,

<sup>6</sup> ixi je e ndo tsjenga ndo na ngajin ngujngu chujni ti ixra tsijinche e na.

<sup>7</sup> Ko tsajon ndo juachaxin tsechón na kain nchakon, ni juée kain juachaxien ndo Dio ko juée na tsechón na ti jii je e ndo, ko ni ndako ko jian juinche e ixra.

<sup>8</sup> Ko tsoñao ndo Dio ngajin ni nchejié aséen ko ni tjaun a tsitikaon ti ndako tjako ndo. Ni ji i tangi tsintekon en na ixi ícha juaxruxin nche e na ti ña i.

<sup>9</sup> Tangi tson en kain ni juinche e nge e ña i, ko ni me e xrochóna na itsjé juachjaon, sa ó ni judío ko kaxon ni je a judío.

<sup>10</sup> Ko ndo Dio tsajon ndo juachaxin ko juaxruxin ko xrochónde e ndo juasaya ngajin kain ni kuitikaon ndo, ko sa ó ni judío ko kaxon ni je a judío.

<sup>11</sup> Ixi ndo Dio je a je o tjue e ndo kaxion chujni ixi kain na naxraje o tjintee na.

<sup>12</sup> Kain chujni chóna ije, ko maski noe a na nge e tsikjin ndo Moisés, xraje o tsama na ije. Ko chujni kuayé e ley tsikjin ndo Moisés, ko nche e na ti ndako a, ley me e tsóñexin na ije.

<sup>13</sup> Je a je o ixi tsin en na ley, me e xrokotjúáxin jíee na. Na i. Xrokonda tsitikaon na nge e tituan an ndo Dio.

<sup>14</sup> Kaxin ni je a judío, siá jian nche e na, maski chúxin a na ley tsiketuan an ndo Dio, je o na ndako tituen en na aséen na, ko no e na nge e jian ko nge e ndakua i jii.

<sup>15</sup> Ixi nge e jian nche e na, tikonni ixi ngaya aséen na jitaxin ti tituan an ley ko aséen na xraxaonxin na á chao ste na o na i.

<sup>16</sup> Naa nchakon ndo Dio sinchéña ndo ijię ngajin kain ti imao juinche e chujni. Ji i tson en ixi juachaxien Ncháina Jesucristo xranchi jitaxin chijni jian tjako jan an.

*Ni judío ko ley tsikjin ndo Moisés*

<sup>17</sup> Kaxinnta ndachronta ixi judío ja anta ko xraxaonnta ixi jian titikaonnta ley kuayé e ndo Moisés ko nchejié asáanta ixi chujnie ndo Dio ja anta.

<sup>18</sup> No anta nge e tjaun ndo Dio ko ixi ley noaxinnta sinche enta ti jian.

<sup>19</sup> Ja anta nchejié asáanta ixi ndachronta ixi chao sinchekuen ennta ni ndako a nche e ko chao tsingatse enta na ixi tsitjáña i na ti ichrji na ti naxixe e.

<sup>20</sup> Ndachronta ixi no anta sinchekuen ennta ni noe a ko tsingijnanta ni tienxin a ixi ja anta chondanta ley chronga xranchi xroxraon chujni ti nduaxin.

<sup>21</sup> Ko ja anta, ¿xranchi sinchekuen ennta ikaxin chujni, siá ja anta tangi anta? ¿Xranchi tsjako enta chujni tsee a na siá ja anta itsenta ti tikinixian inta?

<sup>22</sup> Ndachronta ixi jua i xrochóna na inaa nchri o xi je a janchri e o ndoxi e na, ko ja anta, ¿sonda jaña nche enta? Ndachronta ixi titikaon anta ídolo, ko, ¿sonda te enta nge e tjintee jii ngaxin in ningue ídolo?

<sup>23</sup> Ja anta nchejié asáanta ixi chuxinnta ley, ko titikaon anta nge e tituan an ley, ko jaña chonde anta juasaya ndo Dio.

24 Ndako ndachro xroon jitaxin chijnie ndo Dio: “Kondeexin ja anta ni je a judío nichjangí e n̄a ndo Dio.”

25 Siá nduaxin xrokuitikaonnta ley kuayé e ndo Moisés, je a xruenxon tsikaannta chji e ndo Dio. Ko titikaon anta ley, me e xrokjui xranchi tsikaa inta chji e ndo.

26 Ko chujni tsika i chji e ndo Dio ko titikaon n̄a xranchi tituan an ley, ni me e xranchi ó tsikaa n̄a chji e ndo, maski nduaxin a chón̄da n̄a chji e ndo.

27 Ko chujni kua i chji e ndo ko titikaon ley, ni me e tsjankata anta n̄a ijie ixi ja anta chuxinnta ley ko kuitikaon anta, maski chondanta xroon jitaxin ley ko maski tsikaannta chji e ndo.

28 Ko je a nduaxin judío ja anta je o ixi ó chondanta chji e ndo cuerpoanta xranchi nche e kain ni judío.

29 Ni nduaxin judío xrokonda xrochón̄da n̄a chji e ndo ngaya aséen n̄a, ji i naa nge e nche e Espíritue ndo Dio, ko je a je o tsitikaon n̄a nge e jitaxin xroon. Ko ni nche e jaña, nduaxin judío n̄a, ko ndo Dio jii ndo juaxruxin ixi jaña nche e n̄a maski ikaxin n̄a na i.

### 3

1 ¿Á t̄jintee ti ndachro n̄a judío n̄a? O, ¿á t̄jintee ti tsikaa n̄a chji e ndo Dio?

2 Jaán, t̄jintee me e ixi ndo Dio kuajon ndo chijnie ndo sa ó kuayé e ni judío ixi xrokuitikaon n̄a.

3 Méxin, siá xrojan je e n̄a xrokuitikaon a n̄a, ¿á kondeexin me e, kaxon ndo Dio ísinche a ndo kain nge e tsindachro ndo sinche e ndo ngajin chujni?



<sup>4</sup> Na i. Ndo Dio sinche e ndo kain nge e tsindachro ndo sinche e ndo, maski kain na xrojuincheya na. Ja in ndachro xroon chijnie ndo Dio:

Kain chujni xrondachro na ixi ja anta ndo Dio ko nduaxin ndachronta kain nge e.

Méxin, nchakon tsjankata anta na ijie, ja anta tsjachanta.

<sup>5</sup> Siá ti ndako a nche ena, tjakona ixi ndo Dio jian ndo, ¿méxin nge e xrondachrona? ¿Á chao xrondachrona ndako a nche e ndo Dio ixi tajon ndo juachaxin tangi tsoina? (Jan an rinichja xranchi nichja ngixe i naa chujni.)

<sup>6</sup> Na i, siá ndo Dio je a tsango jian xrokjui ndo, ¿xranchi jian xrojuinchéña ndo ijie ngajin kain chujni nunte xasintajni?

<sup>7</sup> Ko siá kondeexin ti juntaya me e konoxin ti nduaxin juako ndo Dio, ko jaña itsjé na ícha xrochónde e na ndo juasaya, ¿sonda tsama ijie jan an kondeexin ti me e?

<sup>8</sup> Méxin, ¿á cháña sinche eni ti ndako a ixi jaña tsjxin nge e jian? Jan an me e tjako, ichro kaxin chujni, ko méxin, nchekamana na ijie, ko ni jaña tjangina, tangi tsintekon en na kondeexin jaña ichro na.

### *Kainna chondana ijie*

<sup>9</sup> ¿Nge e xrondachro kain ji in? Ixi jan anna judíona, ¿á ícha tjinteena ixi ikaxin chujni? Na i. Ó ndachrjan á judíona o je a judíona, kainkona chondana ijie.

<sup>10</sup> Ndachro xroon chijnie ndo Dio:  
Xro an chujni nche e nge e jian,

kain chujni chón<sub>da</sub> n<sub>a</sub> ijie.

<sup>11</sup> Xro an ngisen tienxin,  
ko xro an ngisen tjée ndo Dio.

<sup>12</sup> Kainko n<sub>a</sub> tsingachrue n<sub>a</sub>,  
ko kain n<sub>a</sub> nche e n<sub>a</sub> ti ndako a me e tsitjáñaxin n<sub>a</sub>.  
Xro an ngisen tjaun sinche e ti jian, ninaa chujni.

<sup>13</sup> Tusin n<sub>a</sub> jii xranchi naa tuye jixrange e ti  
tsixrabaa chujni,  
je o no e n<sub>a</sub> ncheya n<sub>a</sub>.

Ro a n<sub>a</sub> chón<sub>da</sub> nge e xranchi ndachikjeen  
kunchee.

<sup>14</sup> Jeoxón nge e ndako a nichja n<sub>a</sub>,  
ko ndako naa nge e itsjá tonon eni ti nge e nichja n<sub>a</sub>.

<sup>15</sup> Tuinxin chjée n<sub>a</sub> juañao  
ko tjaun n<sub>a</sub> naatsóñaxón n<sub>a</sub> chujni.

<sup>16</sup> Ti ndako a nche e n<sub>a</sub>,  
me e nchetjáña ikaxin chujni ko tika o ícha juach-  
jaon,

<sup>17</sup> ko chúxin a n<sub>a</sub> cha o tajon juaxruxin

<sup>18</sup> ko xraxaon a n<sub>a</sub> xroxrakon en n<sub>a</sub> ndo Dio.

<sup>19</sup> Nojna ixi kain nge e nichja xroon jitaxin  
ti tetuan an ndo Dio, me e kuetuen en kain ni  
kuayé e ley ixi jaña kain chujni ste nunte xasinta-  
jni xrotenko n<sub>a</sub> ko ndo Dio sinchéña ndo ijie ngajin  
kainxin chujni.

<sup>20</sup> \*Ixi xro an ngisen tsomé e jíee ixi je o  
xrokitikaon n<sub>a</sub> nge e tituan an ley. Ley je o  
nchenoina ixi chondana ijie.

*Tsitjáña ina siá chuntiana ndo Cristo*

<sup>21</sup> Ko je a ley tsingijnana ixi chao tsomé e  
jiei<sub>na</sub>. Jai konoxin ixi ndo Dio tsingijnana ndo

xranchi chao tsoomé e jíeina, ko ji i jitaxin xroon ti tsiketuan an ndo Dio ko nge e kuanichja sen kuachronga chijnie ndo Dio ó sa ó.

<sup>22</sup> \*Tsoomé e jíeina ixi chuntiana ndo Jesucristo, ixi je e ndo naxraje o tikon ndo tjintee kainni.

<sup>23</sup> Ixi kain chujni chónnda na ijie, ko jua i tsikon na juachaxin chónnda ndo Dio méxin chonda i na juachaxin tsake e na ti jii ndo Dio.

<sup>24</sup> Juasie ndo Dio ixi tsango jian ndo ko sinchemé e ndo jíeina ixi ndo Cristo Jesús kuen en ndo kondeexin jíeina.

<sup>25</sup> Ndo Dio xruan an ndo ndo Cristo, ko kuenxin ndo kondeexin jaina, ko xrokonda xrochuntiana ndo; jaña tsoomé e jíeina. Jaña juinche e ndo Dio koña a ndo maski kueya ti ndako a jointu una sa ó.

<sup>26</sup> Jaña juakoxin ndo Dio ixi jian ndo, ko jai xrajichon en ndo sinchemé e ndo jíee kain chujni chuntia ndo Jesús.

<sup>27</sup> Méxin, ¿á tjintee ti nchejié aséenni? Na i. Í jua i sinchejié aséen chujni ngajin ndo Dio, ko je a ixi kuitikaonna nge e tetuan an ley, méxin koméexin jíeina. Na i. Koméexin jíeina ixi chuntiana Ncháina Jesucristo,

<sup>28</sup> ko jaina noina ixi tsooméxin jíeina siá chuntiana ngajin ndo, ko je a ixi kuitikaonna nge e kuetuan an ley.

<sup>29</sup> Ndo Dio, ¿á je o Dio ne e ni judío? Na i, je e ndo Dio ne e kain chujni, kaxon ni je a judío.

<sup>30</sup> \*Ixi naakua ndo Dio jii, ko je e ndo sinchemé e ndo jíeina ixi chuntiana ndo ko xrotsje a ndo á

chondana chji e ndo o na i.

<sup>31</sup> Ko siá chuntiana Ncháina Jesucristo, ¿á íxrokuitikaon ana ley kuetuan an ndo Dio? Na i, ícha ndako tsitikaonna ley kuetuan an ndo.

## 4

### *Nge e juako ndo Abraham*

<sup>1</sup> Xraxaonna, ¿á kuitee nge e juinche e ndo Abraham, ndo kuachrjenixinna ó sa ó?

<sup>2</sup> Siá ti ndako juinche e ndo Abraham me e xrokoméexin ixi ti ndako a juinche e ndo, juaxruxin xrobake e ndo ixi me e, ko chao xrojuinchejié aséen ndo, ko kain me e tjinte a ngajin ndo Dio.

<sup>3</sup> \*Ko ndachro xroon jitaxin chijnie ndo Dio: “Ndo Abraham tsango chuntia ndo ngajin ndo Dio, méxin komé e jíee ndo.”

<sup>4</sup> Ko nojna ixi naa ngisen nche e ixra xenge e sen na, je a jañao tayé e sen tomi. Ixi ixra juinche e sen, méxin tjachaxin sen.

<sup>5</sup> Ko je a naxraje o xraxaon ndo Dio. Ndo Dio nchemé e ndo jíee chujni maski xro an ixra juinche e na, je o xrokonda xrochuntia na ndo.

<sup>6</sup> Xranchi ndachro ndo David: Juaxruxin tsintee ni komé e jíee, maski xro an nge e jian juinche e na, je o kuitikaon na ndo Dio.

<sup>7</sup> Ko ja in jitaxin xroon chijnie ndo Dio: Juaxruxin tsintee na ixi ndo Dio juinchemé e ndo jíee na, maski ndako a juinche e na, ko tjáñe e ndo Dio ijie juinche e na.

<sup>8</sup> Juaxruxin tsintee na ixi Ncháina juinchemé e ndo ijie kuachóna na.

<sup>9</sup> A juaxruxin ji i, ¿á je o ni chóna chji e ndo tikinixin en juaxruxin?, o, ¿á kaxon ni chóna i chji e ndo? Ko ó ndachrjan ixi ndo Dio juinchemé e ndo jíee ndo Abraham ixi ndo Abraham chuntia ndo ndo Dio.

<sup>10</sup> Méxin, ¿ngisa juinchemé e ndo Dio jíee ndo Abraham? ¿Á ti ó tsikaa ndo Abraham chji e ndo Dio?, o, ¿á ti xratsika i ndo chji e ndo Dio? Sa ó juinchemé e ndo Dio jíee ndo Abraham, ko tjume e ndo Abraham kua ndo chji e ndo Dio.

<sup>11</sup> Ko ndo Abraham tjume e kua ndo chji e ndo Dio ixi jaña xrojuako ndo ixi ndo Dio ó juinchemé e ndo jíee ndo Abraham ixi chuntia ndo ndo Dio. Tjume e jaña ikjan ndo Abraham ndotée kain sen chuntia\* ndo Dio, maski tsika i sen chji e ndo.

<sup>12</sup> Ko kaxon ndo Abraham, ndotée kain chujni tsikaa chji e ndo Dio, siá chuntia sen ndo Dio xranchi chuntia je e ndo Abraham, nchakon xratsika i ndo chji e ndo Dio.

### *Nge e tsajon ndo Dio ngajin sen chuntia ndo*

<sup>13</sup> \*Ndo Dio tsindache ndo ndo Abraham ixi je e ndo ko ni tsachrjenixin ndo tsayé e na nunte xasintajni. Ko tsayé e ndo Abraham ji i je a ixi kuitikaon ndo ley. Na i. Ixi chuntia ndo ndo Dio ko ndo Dio juinchemé e ndo jíee ndo.

<sup>14</sup> \*Méxin, siá ndo Dio xrokuajon ndo nge e ndachro ndo je o ngajin ni titikaon ley, méxin

---

\* **4:11 chuntia** tener fe    **4:13** Gá. 3:29.    **4:14** Gá. 3:18.

xro an tjintee ti xrochúntiani ndo Dio ko méxin tjinte a ti nge e ndachro ndo xrokuajon ndo.

<sup>15</sup> Siá tsitikaon ani nge e jitaxin ley, tangi tson enni. Ko siá xro an ley xrokuake e, kaxon xrokuama i ijje.

<sup>16</sup> \*Méxin, ti tsindachro ndo Dio tsajon ndo ngajin ndo Abraham ko ngajin kain ni tsachrjenixin ndo, tjintee me e ko je o chuntia ndo Abraham ngajin ndo Dio ko xro an nge e ícha juanchia ndo Dio. Ko chao tsayé eni nge e tsajon ndo Dio ko kaxon ngajin kain sen chuntia ndo, xranchi kuayé e ndo Abraham ixi chuntia ndo ngajin ndo Dio, ko je a je o ni titikaon ley tsayé e na. Méxin jaña, ikjan ndo Abraham ndotée kain chujni.

<sup>17</sup> Xranchi jitaxin chijnie ndo Dio: “Jan an kua-jon juachaxin ixi ja anta xrokjannta ndotée itsjé ni ste nunte xasintajni.” Méxin ndo Dio sinche e ndo nge e tsindachro ndo ixi ndo Abraham jian kuitikaon ndo. Ndo Dio je o je e ndo nchexe chón ndo ni tsiken en, ko tituan an ndo ixi tsake e nge e ko a.

<sup>18</sup> Maski xro an ichjan kuachónnda ndo Abraham, je e ndo kuitikaon ndo ndo Dio, méxin ikjan ndo ndotée kueya chujni xranchi tsindachro ndo Dio ngajin ndo Abraham: “Kueya chujni tsachrjenixin ja anta.”

<sup>19</sup> Maski ndo Abraham ó kuachónnda ndo xranchi naa ciento nano, ko no e ndo ixi ó taka xrokuen en ndo, ko janchri e ndo, jan Sara, ó nachrúi jan ko jua i xrochónnda jan ichjan, je e ndo chuntia ndo ndo Dio,

<sup>20</sup> ko jian no e ndo ixi ndo Dio xrokuajon ndo nge e ndachro ndo. Ko tsango chúntia ndo ndo Dio ko bakajon ndo juasaya ngajin ndo Dio.

<sup>21</sup> Ko no e ndo Abraham ixi chónda ndo Dio ijié juachaxin sinche e ndo kain nge e ti tsindachro ndo.

<sup>22</sup> Méxin, ndo Dio jian bikon ndo nge e juinche e ndo Abraham ti chuntia ndo, ko jaña ndo Dio juinchemé e ndo ijié kuachónda ndo Abraham.

<sup>23</sup> Ko ti jitaxin xroon ixi ndo Dio juinchemé e ndo jíee ndo Abraham, je a je o jíee ndo;

<sup>24</sup> kaxon sinchemé e ndo jíeina ixi tsitikaonna ndo, ndo juinchexe chón Ncháina Jesucristo,

<sup>25</sup> ko kuajon ndo ndo Jesucristo kuenxin ndo ixi jaina. Ko xechón ndo íjngo ixi jaña xrokomé e jíeina ko jai íxro an nge e sinkana.

## 5

### *Jian tsinteena ixi ndo Dio juinchemé e ndo jíeina*

<sup>1</sup> Komé e kain jíeina ixi chuntiana ndo Cristo ko chao stena ngajin ndo Dio ixi Ncháina\* Jesucristo kuenxin ndo ixi jaina.

<sup>2</sup> Ixi juasie Ncháina Cristo Jesús, chao tonchjiñe ena ngajin ndo Dio ixi chuntiana ndo ko je e ndo tjaunna ndo ko méxin jaña ícha chuntiana. Ko juaxruxin stena ixi stechon enna tsayé ena juachaxin ijié chónda ndo.

<sup>3</sup> Ko je a je o me e. Kaxon juaxruxin tsinteena maski tangi stena ngata a nunte nti i ixi noina kain juachjaon me e, ícha nchesoji aséeina.

---

\* **5:1 Ncháina** Señor Ncháina Jesús o Ncháina Dio

<sup>4</sup> Ko ti soji tsintee aséeina, me e jaña jian tsatsingana kain nge e tangi ixi stechon enna naa nge e jian tsii.

<sup>5</sup> Ko ti jian stechon enna nduaxin tsii ixi ndo Dio tsango tjaunna ndo ko tsichjaina ndo Espiritue ndo.

<sup>6</sup> Ko jaina chondana ijie, ko juai jaina sinchemé ena ijie me e. Ndo Cristo kuen en ndo ixi kain chujni chóna jie, kuen en ndo nchakon ndachro ndo Dio kondeexin ijie chóna kain chujni.

<sup>7</sup> Xro an ngisen teenxin ixi inaa ngisen maski sen me e jian sen. Maski chao xrokuenxinni ixi inaa ngisen nduaxin juinche e ti jian.

<sup>8</sup> Ko ndo Dio juakoina ndo ixi tsango tjuaina ndo; maski chondana ijie, xruan an ndo ndo Cristo kuenxin ndo ixi jaina.

<sup>9</sup> Méxin, ndo Dio juinchemé e ndo jéina ixi ndo Cristo kuenxin ndo ixi jaina. Jai ó noina ixi je e ndo chjaina ndo juachaxin tsechónna kain nchakon† ko je a tangi tsatsingana nchakon tsjexin kain nge e.

<sup>10</sup> Ixi, maski bakoñao ena ndo Dio, je e ndo kua-jon ndo juachaxin tsonchjiñe ena ngajin ndo ixi Chjen en ndo kuenxin xjan ixi jaina, ko jai noina ixi tsingijna ndo tsechónna kain nchakon ixi jichón chjen en ndo ko juaxruxin tsonjoku una xjan.

<sup>11</sup> Ko je a je o ji i. Kaxon ndo Dio chjaina ndo juaxruxin ixi chao tonchjiñe ena ngajin ndo ixi juasie Nchána Jesucristo.

*Xi Adán ko ndo Cristo*

---

† **5:9 tsechónna kain nchakon** vida eterna



<sup>12</sup> Sa ó naakua naa sen juinche e ti ndako a, méxin, chujni nchijíi nunte xasintajni kuama na ijie. Jaña kuij kaxon ti ten en aséenni, méxin kaina chondana ijie ko kaina tikinixin enna tsen en na.

<sup>13</sup> Sa ó ti xrabake a ley tsiketuan an ndo Dio, kain chujni nunte xasintajni kuanche e na ti ndako a, ko xro an ley jii, méxin, jua i sinchekamani ijie naa ngisen ndako a juinche e.

<sup>14</sup> Xra ti bake e ndo Adán ko kuiji nchakon bake e ndo Moisés, kuinteken en aséen chujni kondeexin ijie juinche e na. Maski jíee na je a ti kuitikaon a na xranchi juinche e ndo Adán, xro i je e ndo kuitikaon a ndo nge e kuetuan an ndo Dio. Ko ndo Adán juako ndo xranchi xrokuij inaa ndo ícha tjume e.

<sup>15</sup> Ko ijie juinche e ndo Adán jua i xrondachrona naxraje o xro i ti nge e jian nchekituina ndo Dio. Ko xro i naakua ngisen kuitikaon a, kondeexin me e, kueya na kuinteken en na. Jai juasie ndo Dio, xruan an ndo naakua naa ngisen, ndo Jesucristo, ko xro i je e ndo komé e jíeina. Ji i naa nge e ícha jian juinhekitoina ndo xro i kueya na tsayé e na juachaxin tsehón na kain nchakon.

<sup>16</sup> Ijie juinche e naakua naa ngisen je a naxraje o xro i ti juachaxin juinhekitoina ndo Dio, ti tsehónna kain nchakon. Kondeexin ijie ti kuitikaon a ndo Adán, méxin kuamana ijie ko tikinixianna tsen enna. Ko jai juasie ndo Dio juinhekitoina ndo juachaxin tsehónna kain nchakon, ko je e ndo nchemé e ndo kain ijie chondana maski tikinixian ina me e.

<sup>17</sup> Méxin, siá kondeexin ijie juinche e ndo Adán, tsen en kain chujni, jai chao xrondachrona xro i

naakua naa ngisen, me e ndo Jesucristo, je e ndo kontjúáxin ijie kuachondana, méxin chondana juachaxin tsojuna jian ngajin ndo ixi ndo Dio tjuaina ndo, ko xrokonda i jaina sintu una naa nge e ixi tsjachana juachaxin me e.

<sup>18</sup> Méxin, ixi ijie juinche e ndo Adán, kain chujni kuama na ijie ko kuinteken en na. Ko jai ndo Cristo juinchemé e ndo ijie chóna kain chujni, ko kuajon ndo juachaxin tsechón na ixi jian ndo ko kuenxin ndo ixi jaina.

<sup>19</sup> Ixi naakua naa ngisen kuitikaon a, ndo Adán juinche e me e, méxin kueya chujni kuama na ijie. Jaña jai, kaxon naakua naa ngisen jian kuitikaon, me e ndo Cristo, ko ixi je e ndo tsoméxin jieina.

<sup>20</sup> Bake e ley kuetuan an ndo Dio ko chujni ícha juinche e na ti ndako a ko kuama na ijie. Ko maski jaña ícha ijie kuama chujni, ndo Dio ícha bikonóe e ndo na.

<sup>21</sup> Kondeexin ijie me e bake e juachaxin tsen en chujni. Ko jaña kaxon ndo Dio ícha chóna ndo juachaxin sinchemé e ndo jiee chujni ko tsajon ndo juachaxin tsechónna kain nchakon ixi Ncháina Jesucristo kuenxin ndo ixi jaina.

## 6

### *Juasie ndo Cristo stechónna kain nchakon*

<sup>1</sup> Ko jai, ¿á xraxraaxonna sintu una ti ndako a ixi jaña ndo Dio ícha tsikonojina ndo?

<sup>2</sup> Na i. Jai jaina í chonda ina nge e xrotsje ena ngajin kain ti ndako a ko kain ijie tamani ixi ó kuintu ena kain me e.

<sup>3</sup> ¿Á noa inta ixi nchakon bikitéena ó kuitikaonna ko rué ena ndo Cristo, jii xrokjui kaxon xranchi xrokue enna xranchi je e ndo?

<sup>4</sup> \*Nchakon bikitéena, nchakon me e kuen enna ko xrabaana xranchi je e ndo ixi xroxechónna ko xrochondana juachaxin tsechónna kain nchakon ko jian tsajina, xranchi ndo Cristo xechón ndo ixi juachaxin ijié chónnda Ndotée ndo, ndo Dio.

<sup>5</sup> Siá kuen enna xranchi kuen en ndo Cristo, kaxon xroxechónna xranchi xechón je e ndo.

<sup>6</sup> Ó noina ixi sa ó bakamana ijié, ko nchakon ndo Cristo kuen en ndo nganito ntacru jaña kuitjáña kain ijié kuachondana, jaina kaxon kuen enna ko ijié ítituan i ngajinna.

<sup>7</sup> Ixi nchakon ten en naa ngisen íxro an juachaxin jii tsama sen ijié.

<sup>8</sup> Ko jaina, siá kuen enna ixi kuen en ndo Cristo, noina ixi xroxechónna kaxon, ko tsonjoku una ndo kain nchakon.

<sup>9</sup> Noina ixi ndo Cristo xechón ndo ko ínai a tsen en ndo ixi xichononte\* í chónnda i xa juachaxin ngajin je e ndo.

<sup>10</sup> Nchakon kuen en ndo Cristo, kain ijié í chónnda i juachaxin ngajin chujni. Ko jai jichón ndo Cristo ko jii ndo ngajin ndo Dio.

<sup>11</sup> Jaña kaxon ja anta xraxaonnta ixi kain ijié íxro an juachaxin chónnda ngajinnta ixi ó titikaonnta ndo Cristo Jesús ko je e ndo tjáanta ndo juachaxin tsarichonnta kain nchakon, ko ti jai stechonnta, me e sínche enta nge e tjaun ndo Dio.

<sup>12</sup> Méxin, tintue anta tsituan annta ti ndako a

Íjngo ko sinchekateya i cuerpoanta sinche enta ti ndako a.

<sup>13</sup> Tintue anta cuerpoanta sinche e ti ndako a, cháña tájonnta asáanta ngajin ndo Dio xranchi tikinixin sinche e naa ngisen tsiken en ko tsixechón íjngo. Tájonnta cuerpoanta ngajin ndo Dio ixi sinche enta naa ixra jian xranchi tjaun je e ndo.

<sup>14</sup> Ixi jai ijie íxrochónnda i juachaxin tsetuan annta jai ixi i je a ley tituan annta. Na i, ti tjua anta ndo Dio me e tituan annta.

### *Ntu una xrée ndo Dio*

<sup>15</sup> Ko jai, ¿nge e sintu una? ¿Á xrasintu una ti ndako a, me e tsamana ijie ixi ítituan ina ley ko ti tjuaina ndo Dio me e tituainna? Sintu ina jaña.

<sup>16</sup> Ja anta jian no anta ixi, siá titikaonni kain nge e tituan an naa ngisen, je eni ikjanni ni nchexrée sen me e. Jaña ton en kaxon, siá titikaonnta ko nche enta nge e ndako a, ja anta ikjannta ni nche e xrée ti ndako a ko ji i tsenxinni. Ko nchakon tsitikaonnta ndo Dio, je e ndo xrotjáanta ndo juachaxin tsake enta ngajin ndo.

<sup>17</sup> Jai juasie ndo Dio, bikonóa anta ndo. Sa ó kua-chondanta ijie ko ijie me e baketuan anta, ko jai ixi nchijí asáanta kuitikaonnta nge e jian kuin ennta.

<sup>18</sup> Ko jai kuintu enta ti bakamaxinta ijie ko kua-jonnta asáanta ngajin ndo Dio ixi jian nche enta xrée Ncháina Jesucristo.

<sup>19</sup> Jan an rinichja xranchi nichja ngixe i naa chujni ixi ja anta xratienxin anta jian nge e ji i. Sa ó kuitikaonnta nge e ña i ko bakajonta cuerpoanta ixi kuanche enta nge e ndako a. Ko jai

xrokonda tsajonnta cuerpoanta ngajin ndo Dio ixi sinche enta ixra jian xranchi tjaun je e ndo.

<sup>20</sup> Nchakon ti ña i batituan annta kondeexin me e bakamaxinta ijie, jua i kuanche anta nge e tjaun ndo Dio.

<sup>21</sup> ¿Ko nge e juachanta ixi jaña kuanche enta? Jai kain ti ndako a juinche enta, kain me e, tosuaxinnta ko kain me e teenxin chujni.

<sup>22</sup> Ko jai ó komé e jíanta ko ítetuan inta ti ndako a. Jai xrée ndo Dio nche enta. Ko ji i jian tsingijnanta ixi ti tsitikaonnta ndo Dio me e noaxinnta tsarichonnta kain nchakon.

<sup>23</sup> Siá sinche enta ti ndako a, tsamanta ijie, ko ti tsjachanta me e tsen ennta. A ndo Dio je e ndo tajon ndo juachaxin tsechónna kain nchakon siá titika onna Ncháina Cristo Jesús.

## 7

### *Jai tikinixin enna ndo Cristo*

<sup>1</sup> Kichuuna, ja anta chuxinnta ley ko no anta ixi ley chónnda juachaxin tsetuen enni je o ti xrajichónni.

<sup>2</sup> Ji i jii xranchi naa nchri tsikute e, ley tituan an ixi je e nchra tsitikaon nchra xixi e nchra, ko je e xa chónnda xa juachaxin tsetuen en xa nchra ixi xrajichón xa. Ko siá tsij nchakon tsen en xixi e nchra, ley me e ítituan i ngajin nchra.

<sup>3</sup> Ko siá je e nchra satsikao nchra inaa xi ko xrajichón xixi e nchra, je e nchra tsama nchra ijie. Ko siá xixi e nchra tsen en xa, je e nchra íxro an ijie tsama nchra, ko chao xrokjan tsute e nchra ko íxro an ijie tsitsingata a nchra.

<sup>4</sup> Jaña ja anta kaxon, kichuuna, ndo Cristo kuenxin ndo ixi jaina, méxin, ley ítetuan i ngajinna. Jai jaina tikinixin enna ndo Cristo ixi ndo Dio juinchexechón ndo ndo Cristo, méxin chao sintu una xrée ndo.

<sup>5</sup> Ixi nchakon jua i bakintu ena ti ndako a, ley je o banche e ixi jaina ícha tjaunna sinche ena ti ndako a, ko me e kuixin ti tsen enna.

<sup>6</sup> Ko jai ley í chóna i juachaxin tsetuainna ixi xranchi ó kuen enna. Íxro an nge e tingakoina ixi sintu una xrée ndo Dio xranchi naa ngisen natjúá, ixi Espíritue ndo Dio chjaina ndo ko ítsetuan ina naa ley ntaxi jitaxin xroon.

### *Xranche ena ti ndako a*

<sup>7</sup> ¿Nge e xrondachrona ixi ji i? ¿Á xrondachrona ixi ley me e ndako a? Na i. Jan an xrokonóna i nge e xrondachro ti tamani ijié siá xrobake a ley xrochronga. Xrokonóna i nge e xrondachro ti chjuye eni siá ley xrondachro a: “Tuchjuya inta nge e chóna inaa ngisen.”

<sup>8</sup> Tjume e nchakon konóna nge e jitaxin ley, ti ndako a ícha kuetuan an ko ícha tja on sinta a kain nge e ndakua i. Ko siá xrokuake a ley, kaxon ko a ti ña i nchekateyani sinche eni ti ndako a.

<sup>9</sup> Ko nchakon kuichuxin a ley, jan an xro an juachjaon kuachonda, ko nchakon kuichuxin ley, konóna ixi jan an tsango yama ijié,

<sup>10</sup> ko kuichuxin a ndo Dio, ko ley kuajon a juachaxin tsechón chujni, je o kuajon juachaxin tsen eni.

<sup>11</sup> Ixi ti konona ley, me e ti ndako a juincheyana, méxin kuama ijié ko tikinixin tsen enna.

<sup>12</sup> Chao xron<sup>o</sup>dachrjan ixi ndo Dio tsikajon ndo ley, ko nge e tituan an ndo Dio, jian me e.

<sup>13</sup> Ko jua i xron<sup>o</sup>dachrona ixi kondeexin ley tsen enni. Na i. Tsen enni kondeexin ijie chón<sup>o</sup>dani ko ti ndako a nche eni, ixi ley naa nge e ndako tituan an, ko jaña chao tonojina nge e ndakua i jii, ko kaxon no eni ixi tsango ña ini siá sinche eni ti ndakua i.

<sup>14</sup> Jain<sup>o</sup>na nojina ixi ley me e kuajon ndo Dio. Ko jan an jua i tintu a nge e tjaun cuerpona; jan an ícha tja on sinta a ti ndakua i.

<sup>15</sup> \*Jan an tianxin a, ixi ti tjaun a sinta a me e nta a, ko ti tja on sinta a, me e nta i.

<sup>16</sup> Ko maski nta a nge e tjaun a sinta a, nóna ixi ley kuajon ndo Dio, jian ley.

<sup>17</sup> Méxin, je a jan an nta a nge e ndako a. Na i, ti nche e me e, me e juachaxien ti ndako a jii ngaya aséenna.

<sup>18</sup> Jan an tonóna ixi cuerpona tajon a juachaxin sinta a ti jian, ixi maski tja on sinta a nge e jian, jua i nta a me e.

<sup>19</sup> Ko tja on sinta a nge e jian ko jua i nta a me e, ko nta a nge e ndako a ti tjaun a sinta a.

<sup>20</sup> Ko siá nta a nge e tjaun a, ko je a jan an tja on sinta a ji i, kain ji i nche e ti ndakua i jii ngaya aséenna.

<sup>21</sup> Ko nóna ixi nchakon tja on sinta a nge e jian, je o nta a nge e ndako a.

<sup>22</sup> Ko nóna ixi aséenna tsango take e juaxruxin ixi ley kuetuan an ndo Dio.

<sup>23</sup> Ko tonóna ixi ti tetuan an cuerpona, me e ti ndako a, ko ji i tetoka o ley jian jii ngaya aséenna;

ko ti ndako a tjacha tetuan an.

<sup>24</sup> Lastuna nóana. ¿Ngisen tsingijnana ixi konde-  
exin ti nche e cuerpona tsenxinna?

<sup>25</sup> Juasie ndo Dio ixi je e ndo tsingijnana ndo ixi  
kuii Ncháina Jesucristo ko ixi Ncháina tsehónna  
kain nchakon. Jan an nóna ixi xrokonda tsitika on  
ley kuetuan an ndo Dio, maski cuerpona tjaun  
sinche e ti ndako a.

## 8

### *Stechónxinna ixi Espíritue ndo Dio*

<sup>1</sup> Jai sen titikaon ndo Cristo Jesús, íxro an ijiē  
sínká sen. Je o tjaun sen tsitikaon sen Espíritue ndo  
Dio ko nche a sen ti tjaun cuerpoe sen.

<sup>2</sup> Ixi ti tetuan an Espíritue ndo Dio tajon  
juachaxin tsehónna kain nchakon ixi titika onna  
ndo Cristo Jesús. Ko ti ndako a ko juachaxien  
xichononte ítituan i ngajinna

<sup>3</sup> ixi ndo Dio juinche e ndo nge e jua i juinche e  
ley kuayé e ndo Moisés ixi jua i tintu eni ti ndako a.  
Ndo Dio xruan an ndo Chjen en ndo ko ikjan  
xjan xranchi ngixe i chujni chóna ijiē. Kuii ndo  
kuenxin ndo ixi jíee kain chujni nunte xasintajni,  
ko kuantsjengí e ndo ijiē xrokuitjáñaxinna.

<sup>4</sup> Jaña kon en ixi jaña jian xrokuitikaonna kain  
ti tetuan an ley ko xrokuitikaon ana ti ndachro  
cuerpojna. Ícha jian xrokuitikaonna Espíritue ndo  
Dio.

<sup>5</sup> Ni titikaon nge e ndako a tjaun cuerpoe nã, ni  
me e je o xraxaon nã nge e jii nunte xasintajni. Ko  
ni tjaun tsitikaon Espíritue ndo Dio jitjee nã nge e  
tikinixin en Espíritue ndo Dio.



<sup>6</sup> Siá xroxraxaonna je o nge e tjaun cuerpoína, tsen enna. Siá xroxraxaonna nge e tikinixin en Espíritue ndo Dio, xrochondana juaxruxin ko juachaxin tsechónna kain nchakon.

<sup>7</sup> Tjume e ni tsango take e juaxruxin ixi ti ndako a nche e na, ni me e ningakon en na ndo Dio, ixi tjaun a na ko jua i titikaon na ti tituan an ndo.

<sup>8</sup> Ko ni take e juaxruxin ixi nche e na ti ndako a, ni me e jua i sinche e na naa nge e tsake exin juaxruxin ndo Dio.

<sup>9</sup> Ko ja anta ítitikaon anta ti tjaun cuerpoanta. Ja anta titikaonnta Espíritue ndo Dio, siá nduaxin chondanta Espíritue ndo, ko ngisen chóna i Espíritue ndo Cristo, tikinixien a na ndo.

<sup>10</sup> Siá ndo Cristo jii ngajinnta, maski cuerpoanta ndatsen en kondeexin ti ndako a juinche enta, asáanta tsechón ixi ó chondanta juachaxien ndo Dio ixi je e ndo bikonóa anta ndo, ko juinchetjúá ndo asáanta.

<sup>11</sup> \*Ko siá chondanta Espíritue ndo Dio, ndo juinhexechón ndo Cristo, kaxon sinhexechón ndo cuerpoanta tsiken en, ixi Espíritue ndo Dio jii ngajinnta.

<sup>12</sup> Méxin kichuuna, xrokonda tsitikaonna ti tetuan an ndo Dio, ko ísitikaon ana nge e tjaun cuerpoína.

<sup>13</sup> Ko siá sinche enta nge e tjaun cuerpoanta, ndatsen ennta ko ínai a xrotsechónnta. Ko siá tsitikaonnta Espíritue ndo Dio, tsintu enta kain nge e tjaun cuerpoanta, jaña tsarichonnta kain nchakon.

14 Kain sen titikaon Espíritue ndo Dio ó ikjan sen chjen en ndo Dio.

15 \*Ixi Espíritue ndo Dio kuaye enta, je a xranchi ti nge e ña i baketuan anta ó sa ó ko bantaxronkanta. Na i. Espíritue ndo Dio chondana me e juinchekjanna chjen en ndo. Ko Espíritue ndo tajon juachaxin xrondachrona: “Ndotána, ja anta.”

16 Espíritue ndo Dio tonuexin aséeina ixi ikjanna chjen en ndo Dio.

17 Ko siá ikjanna chjen en ndo Dio, tikinixianna tsayé ena nge e tsajon ndo ti tsindachro ndo ó sa ó, jaña tikinixinna nge e tsajon ndo Dio tsayé e ndo Cristo ko jaína. Siá tsikaonna ko tangi tsatsingana xranchi ndo Cristo kon en ndo, jaña kaxon tsayé ena juachaxin xranchi juachaxin tayé e je e ndo.

### *Tsii ijié juachaxin*

18 Ko jai, maski tsatsingana nge e tangi, xro an nge e nche e me e, ixi nge e tsayé ena tjume e ícha jian ko ícha tjintee.

19 Kain nge e jii ngata a inche jichón en ixi ndo Dio tsjakoxin ndo ixi jaína chjen en ndo.

20 Ixi nunte xasintajni ko kain nge e jii ndá tsingachrue, ko je a ixi jaña tjaun. Na i. Jaña tsiketuan an ndo Dio. Ko kain nge e jii ngata a nunte kaxon jichón en

21 ixi tsayé e kain nge e ti chaxro ko tsake e juaxruxin xranchi ste ni tsikjan chjen en ndo Dio.

22 Ó noina ixi kain nge e juinchéña ndo Dio xra tangi tsikon, xranchi tangi tikon naa nchri, nchri nchejongí e chjen en.

23 \*Ko je a je o nge e jii ngata a nunte xas-intajni tangi jii. Kaxon jaina tangi tikonna, jaina ti chondana Espíritue ndo Dio, ixi Espíritue ndo tjakoxin naa nge e ícha tuinxin tsayé ena ko ícha tjume e tsajon ndo Dio. Tangi stetikonna ko stechon enna nchakon ndo Dio tsingijnana ndo ko xrokjanna chjen en ndo Dio ko tsayé ena juachaxin ixi tsen ana.

24 Ó kuaye ena juachaxin tsechónna kain nchakon ixi titika onna ko stechon enna nge e xratikon ana. Siá xrobikonna nge e stechon enna íxrokonda i xrochon enna ícha. Nge e ó tikonni íxrokonda i xrochon enni ti tikonni.

25 Siá stechon enna nge e xratikon ana, xrokonda xrochon enna maski tangi stena.

26 Ko jaña kaxon Espíritue ndo Dio tsingijnana nchakon jua i xrochuntiana ndo Dio. Ixi nóna ina xranchi xronichje ena ndo Dio, ko Espíritue ndo nichjaxin ixi jaina, ko jaina jua i tienxinna xranchi tjanchia Espíritue ndo ixi jaina.

27 Ndo Dio no e ndo nge e tono e aséeina, ko no e ndo nge e tjanchia Espíritue ndo, ixi Espíritue ndo tinóatée xranchi tjaun ndo Dio, ko nichjaxin Espíritue ndo ixi jaina, ni titikaon ndo.

28 Ó noina ixi ndo Dio jian ndo. Maski tangi tatsingana, je e ndo tsingijnana ndo ixi kain nge e jian tsachrje ngajin kain ni tjue e ndo, ni tsikinche e je e ndo ixi jaña tjaun ndo.

<sup>29</sup> Sen ó sa ó tsikinche e ndo, tjaun ndo xrokan sen xranchi chjen en ndo, ko xrobikon sen Chjen en ndo, xjan naakuaxon, ixi xjan me e ícha sa ó xjan.

<sup>30</sup> Sen tsikinche e ndo Dio sa ó, kaxon kuiye e ndo sen, ko sen kuiye e ndo, juinchemé e ndo jíee sen, ko sen komé e jíee, chjée ndo sen ijíe juachaxin.

<sup>31</sup> ¿Nge e xichrona? Siá ndo Dio jii ndo ngajinna, ¿ngisen xrojan nge e sincheina?

<sup>32</sup> Siá ndo Dio kuajon ndo chjen en ndo, xjan naakuaxon, kuenxin xjan ixi kainna, jaña kaxon xrochjaina ndo kain nge e.

<sup>33</sup> ¿Ngisen xrojuankata a ijie ngajin sen tsikinche e ndo Dio siá ndo Dio ó juinchemé e ndo jíee sen?

<sup>34</sup> ¿Ngisen xrojuankata a ijie ngajin sen? Siá ndo Cristo kuenxin ndo ixi je e sen ko xechón ndo íjngo, ko ndatsjonxin jian jii ndo ngajin ndo Dio, ko jitinóatée ndo ngajin ndo Dio ixi kain jaina.

<sup>35</sup> ¿Ngisen xrokuantsjeina ti tjuajina ndo Cristo?, maski chinga xrokoinna, xroningakoinna na, maski tsatsena jinta ko xrochonda ina manta tsetsána, o maski ijie juachjaon xrochondana, o xrokue enna.

<sup>36</sup> Xranchi ndachro xroon chijnie ndo Dio:

Ixi titikaonnanta chondana juachjaon kainxin  
nchakon

ko xrokue enna kondeexin me e,

xranchi kutuchjon tóna na ba,

jaña tsoina kaxon.

<sup>37</sup> Ko maski kain nge e tangi tsatsingana, noina ixi ndo Jesucristo tjuaina na ndo ko tsingijnana ndo tsatsingana kain juachjaon.

<sup>38</sup> Méxin jian noina ixi ninaa nge e tsantsjeina ti tjuaina ndo Dio. Maski ti tsen enna, o maski ti tsechónna, ni sen ángel, o espíritu ña i, o maski nge e jiton en jai, o nge e tson en ícha tjume e,

<sup>39</sup> o nge e jiton en ngajní, o nge e jiton en ti jii ícha yaso e nunte xasintajni, o inaa nge e juinchéña ndo Dio. Ninaa nge e me e tsantsjeina ti tjuaina ndo Dio ixi chjaina ndo chjen en ndo, Ncháina Jesucristo, kuenxin ndo ixi jaina.

## 9

### *Ndo Dio kuinche e ndo ni tjajna Israel*

<sup>1</sup> Jan an titika on ndo Cristo ko méxin, ndachrjan ti nduaxin. Espiritue ndo Dio nchexraxaonna ixi kain me e nduaxin, ko jaña xraxa on ko ntaya i.

<sup>2</sup> Tsango toni e aséenna ko juaxruxin a ritjén

<sup>3</sup> ixi kondeexin ni kichuuna, ni judío, tja on ixi tsitikaon na ndo Cristo, maski jan an xrokuama ijie, siá jii xrobingijna na ixi ndo Dio xrojuinchemé e ndo jíee na.

<sup>4</sup> Je e na tsikachrjenixin na tjajna Israel ko ndo Dio kuinche e ndo na xranchi chjen en ndo, ko jii ndo ngajin na, ko kuajon ndo juachaxien ndo ngajin na ko kuayé e na ti nge e tsindachro ndo tsajon ndo ko kaxon kuajon ndo ngajin na ley kuayé e ndo Moisés, ko juako ndo xranchi xrokuajon na juasaya ngajin ndo, ko chronga ndo nge e tsayé e na.

<sup>5</sup> Ni Israel tsikachrjenixin na ni tsikachrjenixin jaina kaxon, ko kaxon ndo Cristo tsikachrjenixin



14 ¿Ko nge e xichrona? ¿Á xrondachro na ixi ndo Dio ndakua i nche e ndo? Na i.

15 Ixi ndo Dio tsindache ndo ndo Moisés: “Xrotjuá a ngisen tja on xrotjuá a, ko tsikonóa a ngisen tja on tsikonóa a.”

16 Je a ixi chujni tjaun o je a ixi nge e tsijinche e chujni, ndo Dio tinche e ndo ngisen tsikonóe e ndo.

17 Ndachro xroon chijnie ndo Dio xranchi nichje e ndo xi rey tjajna Egipto: “Kuájon juachaxin ixi ja a ikjan rey jaña tsjako juachaxin chóna jan an ixi jaña nchijí nunte xasintajni xrokono e ngisen jan an ko xrokuitikaon na nombréena.”

18 Jaña siá tjaun ndo Dio tsikonóe e ndo xrojan chujni, ni me e tsikonóe e ndo na, ko ngisen tjaun ndo sinchecha ndo aséen sen, jaña nche e ndo kaxon.

19 Ko xrojan ngisen xrondachro: “¿Sonda tsjankata a ndo Dio ijie ngajin chujni siá xro an ngisen tsjacha xronichjangí e ti tetuan an ndo?”

20 Jan an xrojuata a: ¿Ngisen ja anta ixi xronichjangí enta ndo Dio? Xranchi naa ichi tsikónaxin inche xronichja xrondache ngisen juinchéña ichi: “¿Sonda jaña juinchéñana?”

21 Sen nchéña ichi chóna sen juachaxin sinchéña sen nge e tjaun sen. Ko chao sinchéña sen naa ichi tsonda kain nchakon o je o naa chi tsonde e sen nchakon jii kia ko chao je o nchitja o tsonde e sen.

22 Jaña kaxon ndo Dio tjaun ndo xrokjuakoxin ndo ti koña ndo ko ti ijie tetuan an ndo méxin bikonóe e ndo chujni tikinixin en xrokuen en.

<sup>23</sup> Jaña juako ndo ijié juachaxin chónða ndo ixi je e ndo bikonóaina ndo, jaña ó tsixraxaon ndo ó sa ó ixi xrochjijaana ndo.

<sup>24</sup> Ko ndo Dio kuinche e ndo chujni judío ko chujni je a judío.

<sup>25</sup> Jaña ndachro xroon tsikjin ndo Oseas: Ni tikinixin a tjajnána, ni me e xrontatjan ni tjajnána.

Ni tjua i jan an, ni me e xrotjuá a.

<sup>26</sup> Ko tjajna tsindache ndo:

“Je a ni tjajnána”,  
xronache ndo nã íjngo:

“Ni tjajnána ja anta ixi ja anta chjen en ndo Dio, ndo jichón.”

<sup>27</sup> Kaxon ndo Isaías ndachro ndo ixi ni israelita: “Maski ni tsachrjenixin ni Israel, kueya nã xranchi kueya nchese jii ti ndachaon,† je o kaxin nã tsjacha nã tsayé e nã juachaxin tsechón nã kain nchakon

<sup>28</sup> ixi tuinxin tson en nge e tsindachro Ncháina ndo Dio, sinchéña ndo ijié ngajin chujni ste nunte xasintajni.”

<sup>29</sup> Kaxon ndo Isaías tsindachro ndo ó sa ó: Ncháina, ndo Dio, chónða ndo kain juachaxin ixi kuintue a ndo xrokuitjáña kain ni kuachrjenixin ndo Israel xranchi kuitjáña kain ni tjajna Sodoma ko kain ni tjajna Gomorra.

### *Sen judío ko chijni jian*

<sup>30</sup> ¿Nge e ícha xrontatjunta sen je a judío? Jue a sen ndo Dio ixi xrojuinchemé e ndo jíee sen, maski

---

† 9:27 *ndachaon* mar



je e ndo juinchemé e ndo jíee sen ixi je o chuntia sen ngajin ndo Cristo.

<sup>31</sup> A ni israelita kuitikaon na ley ixi xrokoméexin jíee na, ko jua i komé e.

<sup>32</sup> ¿Ko sonda jua i komé e jíee na? Ixi xraxaon na ixi nge e xrojuinche e na, me e ndo Dio xrojuinchemé e ndo jíee na ko xrokuayé e na juachaxin, ko je a ixi xrochuntia na ndo. Méxin ndo Cristo ikjui ndo xranchi naa ixro kontengíxin na kondeexin jíee na.

<sup>33</sup> Jaña chronga xroon chijnie ndo Dio:

Bake é naa ixro tjajna Jerusalén, ixro tsontengíxin na ko tse e na nunte.

Ko ni titikaon ndo, je e na xroxraxaon a na ixi je e ndo tsintu e ndo na.

## 10

<sup>1</sup> Kichuuna, ixi nchijí aséenna, tjancha a ndo Dio ixi tsjeña o ixi ni israelita tsayé e na juachaxin tsechón na kain nchakon.

<sup>2</sup> Jan an nóna ixi ni israelita tsango tjaun na sinche e na xrojan ixra ngajin ndo Dio, ko jua i jian xraxaon na ixi je e na noe a na xranchi sinche e na ti tjaun ndo Dio.

<sup>3</sup> Ko je e na titikaon a na xranchi ndo Dio chao sinchemé e ndo jíee na. Méxin, tjaun na sinche e na inaa nge e ixi jaña ndo Dio tsayé e ndo na ko titikakon a na xranchi kuetuan an ndo Dio sinche e na ixi sinchemé e ndo jíee na.

<sup>4</sup> Ko jai ixi ti kuen en ndo Cristo, ña juexin juachaxien ley tsoméxin ijie, ko jai ixi tsitikaonna ndo Cristo me e sinchemé e ijie chondana.

<sup>5</sup> Ko ti xrokoméexin jíee chujni ixi ley, ndo Moisés ja in tsikjin ndo: “Ngisen tsitikaon kain ley, ni me e tsjacha n̄a tso<sup>m</sup>é e jíee n̄a ko tsechón n̄a kain nchakon.”

<sup>6</sup> Ko ti sinchemé e ndo Dio jíee n̄a ixi chuntia n̄a ngajin ndo ja in ndachro xroon: “Ndachro anta ngaya asáanta: ¿Ngisen saxrokjui ngajní? (Ji i xron-dachro tjaun n̄a xroxingajin ndo Cristo íjngo.)

<sup>7</sup> Ko ndachro anta kaxon: ¿Ngisen xroxingajin ti ícha yaso e ti jii chujni tsiken en?” (Ji i xron-dachro ixi tsjanche enta ndo Cristo xroxechón ndo íjngo.)

<sup>8</sup> Ko xroon chijnie ndo Dio ndachro: “Chijnie ndo Dio jii tjenkanta, ngaya ro anta ko ngaya asáanta.” Chijni me e ndachro ixi xrochuntianta ndo Dio ko me e tjako annanta.

<sup>9</sup> Siá ixi ro anta xron-dachroxinnta ko tsitikaonnta ixi ndo Jesucristo Ncháina, ko siá ixi nchijí asáanta tsitikaonnta ixi ndo Dio juinhexechón ndo Cristo, ja anta tsarichonnta kain nchakon.

<sup>10</sup> Ixi siá nchijí aséeina tsitikaonna ixi ndo Dio sinchemé e ndo jíeina, ko siá ro ana xron-dachroxinna ixi chuxinna ndo Jesucristo, je e ndo tsajon ndo juachaxin tsechónna kain nchakon.

<sup>11</sup> Ndachro xroon chijnie ndo Dio: “Ngisen xrochuntia ndo Dio, sen me e nai a tsosue e sen.”

<sup>12</sup> Ko ndo Dio tikon ndo naxraje o kain chujni, á ni judío o á ni je a judío. Ncháina, Nchée kain chujni ko tingijna ndo kain ni tjanche e ndo.

<sup>13</sup> Kaxon ndachro xroon chijnie ndo Dio: “Kain ni tiye e Ncháina tsayé e n̄a juachaxin tsechón n̄a kain nchakon.”

<sup>14</sup> ¿Ko xranchi xronichje e n̄a ndo Dio siá xrachuxin a n̄a ndo? ¿Ko xranchi tsichuxin n̄a

ndo siá xratien a n̄ ngisen je e ndo? ¿Ko xranchi xrokuin en n̄ siá xro an ngisen tsjako e n̄ ngisen je e ndo?

<sup>15</sup> ¿Ko xranchi tsjako n̄ chijnie ndo siá xro an ngisen xruan an n̄ itsji n̄? Xranchi ndachro xroon jitaxin chijnie ndo Dio: “Juaxruxin tsake eni nchakon tikonni naa chujni chronga chijnie ndo Dio.”

<sup>16</sup> Ko kain a chujni kuitikaon n̄ chijnie ndo Dio. Jaña ndachro ndo Isaías: “Ncháina, ¿ngisen kuitikaon chijni nichjana?”

<sup>17</sup> Jaña xrokonda tsin en n̄ chijnie ndo Dio, me e tsaxi xrochuntia n̄ ndo, ko chijni ti tin en n̄ me e chijnie ndo Cristo.

<sup>18</sup> Ko jan an xraxa on: ¿Á nai a kuin en n̄ chijnie ndo Dio? Jaán, ó kuin en n̄ chijni. Ixi ndachro xroon chijnie ndo Dio:

Chijnie ndo Dio kuin en n̄ nguixin nunte,  
ko ti nichja ndo nchijí nunte xasintajni.

<sup>19</sup> Ko íjngo jan an xraxa on:

¿Á ni israelita xratienxin a n̄?

Jaán, ó kuienxin n̄,

ixi ó sa ó ndachro ndo Dio ti tsikjin ndo Moisés:

Jan an sinta a ixi ja anta tsochjuya anta ngajin  
kaxin tjajna tsikincha i

ko xroningakon ennta naa tjajna tjaun a tienxin.

<sup>20</sup> Ko ndachro ndo Isaías naa nge e ó sa ó ti tsindachro ndo Dio:

Jan an kuajon juachaxin xrokuitjana chujni jitje a  
n̄

ko jan an konoxinna ngajin ni juanchangi a  
ngisen jan an.

21 Ko chronga ndo Isaías nge e ndachro ndo Dio ixi ni israelita: “Nchijí nchakon tja on tsingijna naa tjajna tienxian a ko titikaon a.”

## 11

### *Ndo Dio tintue a ndo ni tjajna Israel*

<sup>1</sup> \*Jai tjanchangi: ¿Ndo Dio á ó kuintu e ndo ni tjajna Israel? Na i, ixi jan an kaxon israelitana, ko kuachrjenixinna ndo Abraham ko tikinixinna ni ndo a ndo Benjamín.

<sup>2</sup> Ixi ó sa ó tsikinche e ndo Dio ni israelita xranchi ni tjajné e ndo. Ko jai tintue a ndo na. ¿Á noa inta xranchi nichja xroon chijnie ndo Dio, ti tsindachro ndo profeta Elías, ti tjankata a ndo ijie ngajin ni Israel? Ko ja in tsindachro ndo:

<sup>3</sup> “Nchána, je e na naakóñaxón na ni kuachronga chijnianta ko konchjenjin na altar na anta ko je o jan an kuituna ti nichja chijnianta ko kaxon tjaun na naatsóñaxónna na.”

<sup>4</sup> Ko ndo Dio juate e ndo ko ndachro ndo: “Xra ste yaato mil chujni titikaon na najan an ko xratakexin a na ntatuchi in na ngajin ídolo Baal.”

<sup>5</sup> Kaxon jaña jiton en jai, kaxin na xratitikaon na ndo Dio, ni tsikinche e ndo.

<sup>6</sup> Jian ndo Dio, ko juasie ndo ixi bikonóe e ndo na, ko je a ixi xrojan ixra juinche e na ixi méxin bikonóe e ndo na. Ko siá jaña xrokjui, je a nduaxin ixi je e ndo bikonóe e ndo na.

<sup>7</sup> Maski itsjé ni israelita jitjee na ndo Dio, ko je o kaxin na kuitja na ndo, ni je e ndo tsikinche e ndo. Ko kaxin na ícha koncha aséen na ko kuitikaon a na.

<sup>8</sup> Xranchi ndachro xroon chijnie ndo Dio: “Ndo Dio kuajon a ndo juachaxin xrokuienxin n̄a, ko kaxon jaña xrajiton en nchakon jai. Kuajon a ndo juachaxin ixi xrobikon n̄a ko xrokuienxin n̄a.”

<sup>9</sup> Kaxon tsikjin ndo David:

Kia nchéña n̄a, me e nchexin n̄a ti ndako a, ko me e xrochónda n̄a ijíe juachjaon.

<sup>10</sup> Ko xranchi itjuj tseta a ikon n̄a me e tsikon a n̄a ko kondeexin ijíe chónda n̄a me e tangi tson en n̄a kain nchakon.

*Ni je a judío kaxon tsayé e n̄a juachaxin tsechón n̄a kain nchakon*

<sup>11</sup> Ko maski ni judío jua i juinche e n̄a nge e tjaun ndo Dio, je a xrondachro ixi ndo Dio ó tjáñe e ndo ixi je e n̄a. Ko ti kuitikaon a ni judío, méxin ni je a judío juacha n̄a kuayé e n̄a juachaxin tsechón n̄a kain nchakon. Ko ji i sinche e ixi ni judío tsochjuye e n̄a ixi je e n̄a juacha i n̄a juachaxin me e.

<sup>12</sup> Ixi kuitikaon a ni judío, ndo Dio kuajon ndo juachaxin ngajin ni je a judío tsitikaon n̄a ndo. Ko nchakon xrokjan ni judío tsitikaon n̄a ndo Cristo, ícha jian ixi ícha itsjé n̄a xrokjan n̄a tsitikaon n̄a ko tsechón n̄a kain nchakon.

<sup>13</sup> Ti xrondachrjan xrokonda tsin ennta, ni je a judío. Ndo Dio xruan anna ndo sintakuan annta ni je a judío, ko ji i tsango tjintee.

<sup>14</sup> Tja on ixi ni tjajnána tsochjuye e n̄a ixi ja anta titikaonnta ndo Dio, ko ixi jaña kaxon kaxin n̄a xrokjan n̄a tsayé e n̄a juachaxin tsechón n̄a kain nchakon.

<sup>15</sup> Ixi kuintu e ndo Dio ni judío, ni je a judío kuitja n̄a juachaxien ndo Dio. Ko siá xrokjan ni judío

tsitikaon na, jaña ni ste xranchi ni tsiken en jai xroxechón na.

<sup>16</sup> Siá xroxrajon naa nutja ó sa ó tsikoña tsayé e ndo Dio, kaxon nchijí chu u tikinixin en ndo, ko kaxon siá tikinixin en ndo nue e naa ntaa, kaxon kain chaan ntaa tikinixin en ndo.

<sup>17</sup> Ko kaxin ni judío xranchi chaan ntaa olivo, ntaa jian konchrinjin ndo Dio, me e je e ndo juinchetsé ndo ikaxin chaan ntaa je o jitangi no jna, ntaa me e xrokjui xranchi ja anta ni je a judío, ko ixi jaña kon en, méxin ja anta kóñanta ni tja-jnéé ndo Dio, ko jaña kuaye enta juachaxin tsarichonnta kain nchakon.

<sup>18</sup> Méxin, xraxaon anta ixi ja anta ícha tjinteenta ixi ni judío, ni kuitikaon a ndo Dio. Xraxaonnta ixi ja anta kuaye enta juachaxin me e kondeexin ni judío, ko je a kondeexin ja anta.

<sup>19</sup> Nchéxin xraxaonnta ixi ndo Dio kuintu e ndo ni judío ixi ja anta xrokjannta ni tjajnéé ndo.

<sup>20</sup> Chao me e. Ko ndo Dio kuintu e ndo na ixi je e na kuitikaon a na ndo. Ko ja anta kuaye enta juachaxin ixi chuntianta ndo. Méxin, nchejié a asáanta. Cháña titikaonnta ndo.

<sup>21</sup> Siá ndo Dio bikonóe a ndo ni judío, jaña kaxon tsikonóa inta ndo siá ndako a sinche enta.

<sup>22</sup> Tsje enta ixi ndo Dio tsango jian ndo, ko kaxon chjée ndo juaña, me e tsajon ndo juachaxin tangi tsintekon en chujni titikaon a. Ko jian ndo ngajinnta, ko jaña sinche e ndo, siá jian tsitikaonnta ko tsajonnta juasaya ngajin ndo. Ko siá na i, je e ndo nduaxin tsintu anta ndo.

<sup>23</sup> Ko ni judío, nchakon tsintu e na nge e ndako a kuanche e na ko tsitikaon na ndo Dio, je e na

xrokjan na ínggo ni tñajnéé ndo, ixi je e ndo chónnda ndo kain juachaxin jaña sinche e ndo.

<sup>24</sup> Méxin, siá ja anta je a sa ó tsikincha anta ndo Dio ixi xrokjuinta ni tñajnéé ndo, ko kuaya anta ndo maski tìkinixin a xrokjuinta ni tñajnéé ndo, ¿xranchi xrokjan i ni tñajnéé ndo, ni nduaxin judío, ni sa ó tsikinche e ndo, ni ikjui tñajnéé ndo?

*Ni Judío tsayé e na juachaxin tsechón na kain nchakon*

<sup>25</sup> Kichuuna, xrajíi itsjé nge e tsono anta ti je o ndo Dio no e ndo, ko jai sintano anta ixi jaña sinchejié a asáanta, ixi ni judío je a kain nchakon tsitikaon a na ndo Jesucristo, ixi tsii nchakon itsjé ni je a judío tsitikaon na ndo, ko tjume e kaxon ni judío xrokjan na tsitikaon na ndo.

<sup>26</sup> Nchakon jaña tson en, tjume e kain ni judío tsayé e na juachaxin tsechón na kain nchakon ixi xroon chijnie ndo Dio ndachro:

Tsi xin tñajna Jerusalén naa ngisen tsingijnanta ko tsantsje ndo ijié chónnda sen tsikachrjenixin ndo Jacob.

<sup>27</sup> Ji i juachaxin tsayé e sen, nchakon sintama a ti ndako a juinche e sen.

<sup>28</sup> Jai ni judío titikaon a na chijni natjúá, méxin, ndo Dio ningakon en ndo na, ko chao tsajon ndo juachaxin ixi ja anta, ni je a judío, tsitikaonnta ndo. Ko jaán, ndo Dio xratjue e ndo ni judío ixi je e ndo tsikinche e ndo sen tachrí e na.

<sup>29</sup> Kain nge e tajon ndo Dio, ko í chijja i ndo ínggo ko kaxon í tintue a ndo ni ó tsikinche e ndo.

<sup>30</sup> Sa ó ja anta baktikaon anta ndo Dio, ko jai ni judío tjaun a na tsitikaon na ndo, méxin ndo Dio jai tikonóa a ndo ja anta.

<sup>31</sup> Ko jaña kaxon, ndo Dio tsikonóe e ndo ni judío xranchi bikonóa anta ndo ja anta.

<sup>32</sup> Ndo Dio kuintu e ndo ixi kain na xrokuitikaon a na ndo, ixi jaña tsikonóe e ndo na kaxon.

<sup>33</sup> Juachaxien ndo Dio tsango ijié ko tsango no e ndo kain nge e. Xro an chujni tienxin xranchi xraxaon ndo Dio, ko xro an chujni chao xrochronga nge e tjaun ndo sinche e ndo.

<sup>34</sup> Ndachro xroon chijnie ndo Dio: “¿Ngisen no e xranchi xraxaon Nchána, ko ngisen chao xrojuinчекuen en ndo nge e sinche e ndo?”

<sup>35</sup> ¿Ngisen xrokuajon nge e xrokuayé e ndo Dio ko jaña xrojuinчекonkjan ndo inaa nge e?”

<sup>36</sup> \*Kain nge e ti xin ti jii ndo Dio, ko kain nge e juinчекonchjian je e ndo, kain me e sinche e ixra ngajin ndo. Ko je e ndo tikinixin en ndo juasaya kain nchakon. Jaña tson en.

## 12

### *Xranchi xrokonda tsintee chjen en ndo Dio*

<sup>1</sup> Méxin, kichuuna, ndo Dio tikonóa anta ndo, méxin, jan an tinóatána ixi nchijí asáanta tjéenta ndo Dio jai, ko tájonnta asáanta ko nchijí ja anta sinche enta xra ixi ó tjúa asáanta ko jaña tikinixin tsajonnta juasaya ngajin ndo.

<sup>2</sup> Ko ínche anta xranchi nche e chujni chúxin a ndo Dio, ni ste nunte xasintajni.\* Cháña tájonnta

---

11:36 1Co. 8:6. \* 12:2 *xasintajni* mundo



juachaxin ixi ndo Dio tsindoxin ndo asáanta ko ti xraxaonnta. Ko jaña tsono anta nge e tjaun ndo Dio sinche enta, me e ti jian ko ti chaxro.

<sup>3</sup> Juasie ndo Dio, kuajon ndo ixra nta a ngajin ndo. Méxin, ntatjunta xroxraxaon anta ixi ja anta ícha tjinteenta. Na i. Xraxaonnta jian ixi juachaxin tjáanta ndo Dio ixi chuntianta ndo.

<sup>4</sup>\*Jaña cuerpoína, kueya parte chóna. Ko ngu-jngu me e ja e naxraje o ixra nche e.

<sup>5</sup> Jaña kaxon jaína, maski kueyana, ikjanna naakua cuerpoe ndo Cristo. Jaña naakua xrox-raxaonna ixi ó ikjanna kainna naakua cuerpoe ndo.

<sup>6</sup>\*Ko ndo Dio kuajon ndo kueya ixra sintu una, ko kuajon ndo ngajin ngu-jngu jaína xranchi tjaun je e ndo. Ko xrokonda jian sinche ena ti ixra kuajon ndo. Méxin, siá tajon ndo juachaxin ixi xronichjana chijnie ndo, xrokonda sinche ena ixra me e xranchi nduaxin chuntiana ndo.

<sup>7</sup> Siá chjaína ndo Dio ixra ti tsingijnana chujni, xrokonda jian sinche ena xra me e. Ko ngisen tsikayé e juachaxin tsjako, xrokonda ixra me e sinche e sen.

<sup>8</sup> Ngisen tsikayé e juachaxin sinchexraxaon inaa ngisen naa nge e jian, xrokonda ixi nchijí aséen sen sinche e sen ixra me e. Ko ngisen tsikayé e xra ixi tsajon xrojan nge e, xrokonda juaxruxin tsajon sen. Ko ngisen tsikayé e ixra tsetuan an, jian xrokonda tsetuan an sen, ko ngisen tsikayé e xra xrobingijna ngajin ni chóna i, xrokonda juaxruxin tsingijna sen.

*Xranchi tsintee sen titikaon ndo Cristo*

<sup>9</sup> Ko nchijíi asáanta xrotjue e kichuunta. Tintu enta kain nge e ña i ko xraxaonnta kain nge e jian.

<sup>10</sup> Tjue e kichuunta ixi titikaonnta Ncháina Jesús ko chónde e kichuunta juasaya.

<sup>11</sup> Jian nche enta ixra ko tosa inta, ko nche enta ixra ngajin Ncháina ixi nchijíi asáanta.

<sup>12</sup> Take énta juaxruxin ixi ti xrastechon ennta ti jian tsii, ko chá anta maski tangi tson annta, ko tintue anta nichje enta ndo Dio.

<sup>13</sup> Tingijnanta sen titikaon Ncháina siá xro an nge e chónda sen. Taye énta sen tii ndointa ko tájonnta juachaxin tsitu e sen ndointa.

<sup>14</sup> \*Tjanche enta ndo Dio sinchenaon† ndo ni ndakua i nta anta ko tjanche anta ndo Dio ixi xrojan nge e ndako a tson en na.

<sup>15</sup> Chá anta ngajin sen ste juaxruxin, ko siá xrojan ngisen yaa juachjaon ko stetsjanga sen, tsjangaku unta sen.

<sup>16</sup> Juaxruxin tinteeku unta sen kichuunta ko nchejié a asáanta ko chaxro tjentonta sen xro an nge e chónda, ko xraxaon anta ixi ícha no anta.

<sup>17</sup> Ko siá ndako a sinta anta xrojan chujni, tjenge anta. Cháña nche enta ti jian ixi jaña tsikon kain na.

<sup>18</sup> Tjéenta ixi nchijíi asáanta jian tsinteku unta kain na.

<sup>19</sup> Kichuuna, ja onta nchéña inta ijie ngajin inaa chujni, cháña tintu enta ixi ndo Dio je e ndo sinchéña ndo ijie ngajin na, xranchi ndachro

xroon chijnie ndo: “Jan an tikinixinna sintañña ijje ko jan an xrotjá a nã ti tikinixin en nã.”

<sup>20</sup> Kaxon ndachro xroon: “Siá ni ningakon annta kuen en nã jinta, chje énta nã sine nã, ko siá kuen en nã inda, chje énta nã tsi i nã. Jaña tsosue e nã ixi ja anta jian juinche enta ngajin nã.”

<sup>21</sup> Tintue anta ixi tsjacha ti ñña i ngajinnta; cháña nche enta ti jian ixi jaña ti jian tsjacha.

## 13

### *Tsitikaonni ni tituan an*

<sup>1</sup> Kain nã xrokonda tsitikaon nã ni tituan an, ixi juachaxin chónnda nã, ndo Dio tsikajon juachaxin, ixi xro an ni tituan an xrobake e siá je a ndo Dio xrokuajon juachaxin.

<sup>2</sup> Chujni titikaon a ni tituan an kaxon titikaon a nã nge e tsiketuan an ndo Dio. Ko ni jaña nche e, tangi tson en nã.

<sup>3</sup> Ko ni tituan an ste a nã ixi sinchexronka nã chujni nche e jian. Na i, ni nche e ndako a. Siá tjaunnta ixi ni tituan an sintaxronka inta nã, ndako ko jian nche enta, ko jaña je e nã kaxon ndako xronichja anta nã.

<sup>4</sup> Ixi ndo Dio kuetuan an ndo ixrã stenche e nã ixi jaña ja anta jian tsinteenta. Ko siá sinche enta ti ndako a, xrokonda xroxronkanta ixi je a xruenxon ste ni tituan an. Je e nã chónnda nã juachaxin sintajenganta nã i nã ixi je e nã nche e nã xrée ndo Dio, sinchejengana nã ni ndako a nche e.

<sup>5</sup> Méxin, xrokonda tsitikaonnta ni tituan an, je a je o ixi sintajenganta nã nã ixi ti ndakua i

juinche enta. Na i. Ixi jaña tikinixin tsitikaonnta na.

<sup>6</sup> \*Kaxon ja anta tjenganta na ngajin ni tituan an ixi je e na stenche e na ixra tsikajon ndo Dio, ko nche e na nge e tikinixin.

<sup>7</sup> Kaxon chje énta na nge e tikinixin tsayé e na. Sen xroxenge e na ixi jaña tikinixin, xroxenge e na, ko ngisen sínká ixi juinchekji sen xrojan nge e, tsjenga sen na, ko siá tikinixin tsajonnta juasaya, tájonnta juasaya.

<sup>8</sup> Kaxon xro an ngisen tasinke enta. Je o ti xrokonda tsasinke e kichuunta, mee ti xrotjue enta kichuunta, ixi ngisen tjaun ko tjue e ni kichuu, ó kuitikaon sen nge e kuituan an ley.

<sup>9</sup> Ixi ndachro xroon jitaxin chijnie ndo Dio: “Xrochonda inta inaa nchri je a janchri anta, ko tóña inta kichuunta, ko temá inta, ko nichja inta nge e nduaxin a ixi inaa ngisen, ko tochjuya inta nge e chónða inaa chujni.” Kain ji i ko ikaxin nge e kuituan an ndo Dio xrondachro naakua naa chijni tsiketuan an ndo: “Xrotjue e kichuuna xranchi tjue ena aséejna.”

<sup>10</sup> Chujni tjue e kichuu, xro an nge e ti ndako a jincheckao inaa chujni. Cháña, tjue e kichuunta ixi jaña tsitikaonnta jian kain nge e jitaxin ley.

<sup>11</sup> Kain ji i xrokonda sinche ena jai ixi ó kuii nchakon xroxingamajna ixi íse a ó tsii nchakon tsayé ena juachaxin tsechónna kain nchakon, ixi tsonchrjen a ó tsii kain ji i je a xranchi nchakon ti juangíxin kuitikaonna.

<sup>12</sup> Jai ó juexin tiie ko íse a tsingasáña, ko jai xrokonda tsintu ena ti kuanche ena ti kuajina ti

naxixe e, ko xrochondana juachaxien Espíritue ndo Dio, me e tsingijnana tsajina ti tingasáña.

<sup>13</sup> Xrotsje ena jian xranchi tsajina ti tingasáña taanchakon. Tsaji ana kiée chujni ti no te to na ko ti kuan na, ko xroxraxaon ana xrochondana inaa sen je a janchri ina o ndoxi ina, ko tsinteketo ana ngajin inaa chujni ko xrochuya ina.

<sup>14</sup> Cháña taye énta juachaxien Ncháina Jesucristo, ko íxraxaon anta sinche enta nge e ti ndakua i.

## 14

### *Nichja inta kontree inaa sen kichuunta*

<sup>1</sup> \*Jian nichje enta sen xratiexin a nge e tetuan an ndo Dio, ko siá je a naxraje o tienxinnta chijnie ndo, tjakaxin a kichuunta.

<sup>2</sup> Ste kaxin sen ndachro sen chao sine sen kain nge e ixi soji titikaon sen, ko ste kaxin sen soji a sen ixi ti nge e titikaon sen, méxin ne a sen ntao.

<sup>3</sup> Ko ngisen ine kain nge e tsjanao i sen sen ne a ntao, ko ngisen ne a ntao, tsjanao i sen sen ne kain nge e, ixi ndo Dio nataonxin kuayé e ndo sen.

<sup>4</sup> Ixi, ¿ngisen ja anta ixi xronichjanta kontree naa sen kichuunta, sen nche e ixra ngajin inaa ngisen? Siá sen nhexra me e, á chao o chao a juinche e sen ixra, nchée sen me e xrondachro á chao o chao a jii ti juinche e sen. Ko jian ixra sinche e sen ixi Ncháina chóna ndo ijié juachaxin tsingijna ndo sen ixi jian sinche e sen.

<sup>5</sup> Ko ste kaxin sen xraxaon sen tsango tjintee naa nchakon ko inaa nchakon na i. Ko ikaxin sen ndachro sen ixi kain nchakon xraje o nchakon.

Méxin, ngujngu ja anta ti jian xroxraxaonnta me e nche enta.

<sup>6</sup> Ngisen xraxaon ixi naa nchakon ícha tjin-tee, je e sen jaña xraxaon sen ixi chónde e sen juasaya Ncháina, ko kaxon sen titikaon a jaña, kaxon chónde e sen Ncháina juasaya, maski je a xraje o xraxaon a sen. Kaxon sen ine kain nge e, ine sen ixi jaña chónde e sen juasaya Ncháina ko tajon sen juasaya ngajin ndo Dio. Kaxon jaña nche e sen ne a ntao, ko kaxon tajon sen juasaya ngajin ndo Dio.

<sup>7</sup> Ixi ninaa jaina jua i xrokuechón ana ni xrokue enna; kain jin ton en ixi juachaxien Ncháina.

<sup>8</sup> Siá stechónna o ndatsen enna, jaina tsajonna juasaya ngajin ndo Dio. Méxin, maski tsen enna o maski tsechónna, jaina tikinixin enna ndo Cristo.

<sup>9</sup> Méxin, ndo Cristo kuen en ndo ko xechón ndo íjngo ixi tsetuan an ndo ngajin ni tsiken en ko ngajin ni stechón.

<sup>10</sup> \*Ko ja anta, ¿sonda nichjanta kontree inaa sen?, o, ¿sonda chonde anta juasaya ngajin kain chujni? Kainna xrokonda tsonchjiñe ena ngajin ndo Cristo ixi sinchéñaina ndo ijie.

<sup>11</sup> Ndachro xroon jitaxin chijnie ndo Dio: Jan an ixi ríchon, ndachrjan ixi kain chujni tsakexin nã ntatuchi in nã ngajin ko kain chujni xrondachro nã ixi jan an ndo Dio ne e nã.

<sup>12</sup> Jaña kainna tsatsingana ngajin ndo Dio ixi sinchéñaina ndo ijie xranchi kuinteena ngata a nunte nti i.

### *Chungíe a kichuunta*

13 Méxin, cháña xrochungi ana kichuuna ko xro an nge e ti ndako a xronichjana ixi inaa ngisen, ixi kondeexin jaina naa sen titikaon Ncháina ba tsama sen ijie o ísitikaon a sen ndo Dio.

14 Jan an titika on Ncháina Jesús, me e nómaxin ko a nge e tjúá i. Ko siá xrojan ngisen xraxaon ixi naa nge e ine sen tjúá i, cháña sine a sen.

15 Siá naa sen kichuunta xraxaon sen ixi tjúá i nge e intenta ko me e ncheni e aséen sen, me e xrondachro ítjue anta sen; méxin, ja anta cháña ínte anta nge e ndachro inaa sen ixi tjúá i ixi jaña sen kuenxin ndo Cristo tsitjáña i sen.

16 Ko tintue anta ixi ndako a xronichja na ti nge e jian titikaonnta ixi juachaxin tjáanta ndo Jesucristo.

17 Ixi juachaxien ndo Dio je a ti sinena o nge e tsu una. Na i. Juachaxien ndo Dio tituan an ixi jian tsojuna ko juaxruxin tsintena ixi Espíritue ndo Dio tajon kain ji i.

18 Sen jian nche e ixra ngajin ndo Cristo, sen me e stenze e sen nge e tjaun ndo Dio, ko ikaxin chujni xronichja jian ixi je e sen.

19 Méxin, nche ena kain nge e tika o juaxruxin, ixi me e tsingijna sen kichuuna ko jaña ícha tsitikaon sen Ncháina Jesús.

20 Méxin, tintue anta tsitjáña ixra juinche e ndo Dio kondeexin ti sineni, ixi kain nge e ineni, o juinchetjúá ndo Dio. Siá xrojan nge e sineni me e xroxraxaon inaa sen ixi ndako a jii ko kondeexin me e tsitjáña nge e o kuitikaon sen, cháña sine ani.

21 Méxin, ícha tjintee sinte anta ntao ko tsi anta

ixran siá inaa ngisen xroxraxaon ndako a me e, ko xro an nge e sinche enta ixi jaña tsama sen kichuunta ijie.

<sup>22</sup> Nge e jian titikaonnta, ja onta ko ndo Dio no anta. Ko juaxruxin tsake e ngisen xraxaon ixi xro an ijie yama sen kondeexin nge e nche e sen.

<sup>23</sup> Ko ngisen ine xrojan nge e ko jixraxaon sen ixi ndakua i jii, sen me e tsama sen ijie, ixi xraxaon sen ndakua i jii nge e juinche e sen. Ixi ti ndu-axin a chúntiani nge e nche eni, me e yamaxinni ijie.

## 15

### *Tingijnanta ixi ícha soji titikaon sen kichuunta*

<sup>1</sup> Jainna siá ícha soji titikaonna Ncháina Jesucristo, xrokonda tsingijnana sen xrasoji a titikaon ndo, ko sinche ana je o ti ncheina juaxruxin.

<sup>2</sup> Kainna xrokonda sinche ena ti jian ngajin sen kichuuna, ko jaña tsingijnana sen ixi ícha xrochuntia sen Ncháina Jesucristo.

<sup>3</sup> Ixi ndo Cristo juinche a ndo je o ti juinche e ndo juaxruxin. Na i. Je e ndo kuitikaon ndo nge e ndachro xroon chijnie ndo Dio: “Tangi juinchenina ti nichjangí e na ndo Dio.”

<sup>4</sup> Kain nge e jitaxin xroon chijnie ndo Dio tsiketaxin ixi jaina xrokonoina nge e jian, ko xrochon enna nge e tsayé ena, maski tangi tsoina, ixi chijnie ndo Dio chjaina juachaxin ixi xrochondana juaxruxin.

<sup>5</sup> Ko ndo Dio, me e ndo tingijnana ko chjaina ndo juaxruxin, tsingijnanta ndo ixi jian tsariku unta



sen kichuunta, ko tsinteenta xranchi juako ndo Cristo Jesús.

<sup>6</sup> Ko kainna naxraje o xronichje ena ndo Dio ko tsajonna juasaya\* ngajin ndo, Ndotée Ncháina Jesucristo.

*Chijni jian tsayé e ni je a judío*

<sup>7</sup> Méxin, titikaonnta ko tje é kichuunta xranchi ndo Cristo kuaya anta ndo, ko jaña tsajonnta juasaya ngajin ndo Dio.

<sup>8</sup> Jan an chao xrondachrjan ixi ndo Cristo kuii ndo ixi tsingijna ndo ni judío ixi tson en nge e jian tsindache ndo Dio sen tachrí ana ó sa ó, ixi jaña tsjako ndo Cristo ixi ndo Dio jian ndo ko nche e ndo nge e tsindachro ndo.

<sup>9</sup> Kaxon kuii ndo ixi ni je a judío tsajon na juasaya ngajin ndo Dio ixi bikonóe e ndo na, xranchi chronga xroon chijnie ndo Dio:

Jan an ko chujni ste jée tjajna tsajonna juasaya ngajin ndo Dio ko xrotsjena himno ngajin ndo.

<sup>10</sup> Kaxon ndachro chijnie ndo Dio:

Ja anta ti je a judíonta, take énta juaxruxin ngajin kain chujnie ndo Dio.

<sup>11</sup> Kaxon íjngo tsindachro xroon chijnie ndo Dio:

Tájonnta juasaya ngajin Ncháina Dio kainnta, maski je a judíonta,

ko kain chujni xrotsje ngajin ndo Dio.

<sup>12</sup> Kaxon ndo Isaías tsikjin ndo:

Tsachrenixin ndo Isaí naa ngisen

tsetuen en kain ni je a judío,

ko je e na tsitikaon na ndo Dio,

---

\* **15:6 juasaya** respeto, honor

ko me e tsechón nà kain nchakon.

<sup>13</sup> Ndo Dio, ndo tsajon juachaxin stechon ennta, xrotjáanta ndo juaxruxin ko xrocha anta ixi titikaonnta ndo, ixi juachaxien Espíritue ndo xrochon énta nge e tsaye enta.

<sup>14</sup> Kichuuna, nduaxin nóna ixi ja anta jiannta ko jian tienxinnta ko no anta me e sinchekuen ennta sen kichuunta.

<sup>15</sup> Ko jaña ikjin xroon ji i ixi jian tsono anta nge e sinche enta ko xrotjáña inta. Jaña nta a ixi ixra ji i kuituanna ndo Dio sinta a,

<sup>16</sup> ko kuinchena ndo sinta a xrée ndo Jesucristo, xronichja chijnie ndo Dio ngajin ni je a judío. Ixra me e ti tjako chijni jian ixi tsayé e nà juachaxin tsechón nà kain nchakon, ko je e nà xrokjan nà xranchi naa nge e jian tsayé e ndo Dio ixi Espíritue ndo.

<sup>17</sup> Jan an naa ngisen titikaon ndo Cristo Jesús, méxin, juaxruxin ritjén ixi nta a xrée ndo.

<sup>18</sup> Ko jua i xrondachrjan inaa nge e. Je o ndachrjan kondee juachaxin kuajon ndo Cristo kuayá a ixi xronichja ngajin ni je a judío chijnie ndo ixi tsitikaon nà ndo Dio. Ko ó kuitikaon nà ixi chijni juáko ko je a ixi je o ti nichja, kaxon ixi nge e jian junta a.

<sup>19</sup> Ixi juachaxien Espíritue ndo Dio junta a itsjé ixra ijié ko juntakuan an nà chijnie ndo Cristo ixi jaña tsechónna kain nchakon. Ko juangíxin juáko tjajna Jerusalén ko kain tjajna tjenka nti a ko nguixin no Iliria.

<sup>20</sup> Ko tja on tsjáko chijni tajon juachaxin ngajin tjajna ti xratien a nà chijnie ndo Cristo, ixi jan an

tjaun a sinta a ixra ti no inaa sen ó juinche e sen ixra.

<sup>21</sup> Tja on sinta a xranchi ndachro xroon chijnie ndo Dio:

Xrokuin en ni xranai a tsikin en chijnie ndo.

Ko xrokuienxin chujni, ni xratiexin a chijnie ndo.

*Ndo Pablo xraxaon ndo itsji ndo tjajna Roma*

<sup>22</sup> \*Ó itsjé nchakon tja on xrojuasótsja anta ko xrajua i tjaso.

<sup>23</sup> Ko jai ó juexin ixra rinta a nguixin nti i. Ko ó tsjé nano tja on xrojuasótsja anta,

<sup>24</sup> méxin, xraxa on tsjaso nchakon tsatsinga itsji tjajna España. Jua i tsituna itsjé nchakon ngajinta ko nóna ixi juaxruxin tsake e ixi tsikonnta, ko tja on tsingijnaninta nchakon satsjixin nti a.

<sup>25</sup> \*Ko jai satsji tjajna Jerusalén, tsiki an tomi tsingijnaxin sen kichuuna nti a.

<sup>26</sup> Ixi sen ni ngo nunte Macedonia ko sen ni ngo nunte Acaya jua o sen tomi ixi xroxruan an sen ngajin sen kichuuna, sen nóa, ste tjajna Jerusalén.

<sup>27</sup> \*Je e sen, sen je a judío, juaxruxin juinche e sen ji i, ixi sen judío titikaon ndo Cristo bingijna ti je e sen, sen tjajna Macedonia, ixi xrokono e sen chijnie ndo Dio ó seno. Ko jai kaxon je e sen bingijna sen ko kuajon sen nge e chóna sen ixi xrokuayé e sen judío titikaon Ncháina.

<sup>28</sup> Ko nchakon tsajon tomi ngajin sen kichuuna, tjume e jan an satsji tjajna España ko no ña tsatsinga tsjasotsja anta.

<sup>29</sup> Nóna ixi nchakon tsjaso nti a tjajna Roma xrontatjunta kain nge e jian juinche e ndo Cristo ngajin.

<sup>30</sup> Kichuuna, tinóatáana ixi Ncháina Jesucristo ko Espíritue ndo, ti tajon juachaxin tjue e kichuuna, tjanche enta ndo Dio ixi tsingijnana ndo.

<sup>31</sup> Kaxon tjanche enta ndo ixi tsingijna ndo ixi xro an nge e sinchena ni titikaon a ndo Dio, ni jii tjajna Judea, ko tomi tika an sen kichuuna ste tjajna Jerusalén, jian tsayé e sen tomi.

<sup>32</sup> Tjume e, siá ndo Dio tjaun ndo, juaxruxin tsjaso ti stenta ko juaxruxin tsjokéena nti a.

<sup>33</sup> Ndo Dio, ndo chjajna juaxruxin, tsake e ndo ngajin kainnta. Jaña tson en.

## 16

*Ndo Pablo xruan an ndo juajna ngajin sen chúxin ndo*

<sup>1</sup> Ixudio tingijnanta jan kichuuna Febe. Je e jan jian nche e jan xrée ndo Dio ti ni ngo jii tjajna Cencrea.

<sup>2</sup> Tayé énta jan ixi juachaxien Ncháina, xranchi tikinixin sinche e sen kichuuna titikaon Ncháina. Tingijnanta jan ixi xrojan nge e xrokonde e jan, ixi je e jan tsango bingijna jan kueya chujni ko kaxon jan an bingijnana jan.

<sup>3</sup> \*Tájonnta juajna ngajin jan Priscila ko ndo Aquila. Je e sen ko jan an junta ana xrée ndo Cristo.

<sup>4</sup> Je e sen xrokuen en sen ixi bingijnana sen, méxin, tajon juasiana ngajin sen, ko je a je o jan an, kaxon kain sen kichuuna, sen ni ngo je a judío.

<sup>5</sup> Tájonn̄ta juajna kaxon ngajin kain sen kichuuna xra o ndo a jan Priscila ko ndo Aquila. Nichje enta ndo Epéneto, ndo tsango jian tjento, ndo me e sa ó juangixin kuitikaon ndo ndo Cristo nunte Acaya.

<sup>6</sup> Chje énta juajna jan María ixi kaxon je e jan tsango juinche e jan ixra nti a ti stenta.

<sup>7</sup> Kaxon tájonnta juajna ngajin sen tsikix̄in tja-jnána, ndo Andrónico ko kaxon ndo Junias, sen kuariki an ndo achjiso. Kain sen kichuuna tsango tjento, sen me e ó sa ó kuitikaon sen ndo Cristo ko tjume e jan an.

<sup>8</sup> Kaxon tájonnta juajna ngajin ndo Amplias ixi je e ndo naa ndo chuxin ko tsango tjua a, ko titikaon ndo ndo Cristo.

<sup>9</sup> Tájonn̄ta juajna ngajin ndo Urbano ixi kayuina junta ana xrée ndo Jesucristo, ko tájonnta juajna ngajin ndo tsango tja on, ndo Estaquis.

<sup>10</sup> Tájonn̄ta juajna ngajin ndo Apeles. Je e ndo tsango tangi kon en ndo ixi kuitikaon ndo ndo Cristo. Kaxon tájonnta juajna ngajin sen ndo a ndo Aristóbulo.

<sup>11</sup> Kaxon tájonnta juajna ngajin ndo kichuuna Herodión, ko kaxon ngajin kain sen ndo a ndo Narciso ixi kaxon titikaon sen Ncháina.

<sup>12</sup> Tájonn̄ta juajna ngajin jan Trifena ko jan Trifosa. Je e sen juinche e sen xrée Ncháina, ko nichje enta kaxon jan kichuuna Pérsida, jan tjua a. Je e jan juinche e jan xrée Ncháina Jesucristo.

<sup>13</sup> \*Kaxon ngajin ndo Rufo tájonnta juajna. Je e ndo naa ngisen tsikinche e Ncháina, ko nichje enta

janée ndo ixi kaxon bingijnana jan ko jan an tja on jan xranchi janána.

<sup>14</sup> Kaxon nichje enta ndo Asíncrito ko ndo Flegonte ko ndo Hermes ko ndo Patrobas ko ndo Hermas, ko ikaxin sen kichuuna, sen stekao sen nti a.

<sup>15</sup> Kaxon tájonnta juajna ngajin ndo Filólogo ko Julia ko Nereo ko jan kichuu ndo ko ndo Olimpas ko kain sen kichuuna titikaon Ncháina stekao sen.

<sup>16</sup> Ko chje é kichuunta juajna ko tjue é kichuunta. Kain sen ni ngo tikinixin en ndo Cristo xruan annta sen juajna.

<sup>17</sup> Kichuuna, tinóatána ngajinnta jian tsje enta ngisen jitansetsjendaa sen kichuuna titikaon Ncháina. Sen me e titikaon a sen jian chijnie ndo Dio kuayé e ja anta. Méxin, cháña tjento anta sen.

<sup>18</sup> Sen jaña nche e, je a xrée Ncháina Jesucristo nche e sen. Je o nche e sen nge e tjaun sen ko ti xraxaon sen, ko chaxro nichje e sen chujni xra-noe a ko jaña ncheya sen ngajin sen.

<sup>19</sup> Kain chujni no e nã ixi ja anta jian titikaonnta Ncháina. Méxin, jan an ritjén juaxruxin ko tja on sinche enta ti jian, ko sinche anta ti ndako a.

<sup>20</sup> Ndo Dio, ndo tsango tajon ndo juaxruxin, ó tuinxin tsantsje e ndo Xixron anxrée ti tituan an xa. Ko Ncháina Jesucristo sintanchaonnta ndo.

<sup>21</sup> \*Ndo Timoteo xruan annta ndo juajna. Je e ndo ko jan an xraje o xrã stenta ana. Kaxon ndo Lucio ko ndo Jasón ko ndo Sosípater, sen tjajnána, xruan annta sen juajna.

<sup>22</sup> Jan an Tercio, rikjin xroon ji i ixi ndo Pablo ndachijina ndo nge e xrokjin, kaxon xruan annta juajna ixi juachaxien Ncháina.

<sup>23</sup> \*Ndo Gayo xruan annta ndo juajna. Je e ndo kuajon ndo juachaxin titunana ndo a ndo, ko kaxon ndo a ndo stexra o sen ni ngo. Ko ndo Erasto xruan annta ndo juajna. Je e ndo tja o ndo tomie tjajna, ko ndo kichuuna ndo Cuarto kaxon xruan annta ndo juajna.

<sup>24</sup> Ncháina Jesucristo sintanchaonnta ndo kain ja anta. Jaña tson en.

<sup>25</sup> Jai tajonna juasaya ngajin ndo Dio ixi je e ndo ícha sinchesoji ndo asáanta xranchi nichja chijnie ndo Dio, chijni me e jan an ó juntakuan annta, ko me e chijnie ndo Jesucristo. Ko ji i nduaxin, ndo Dio juinchenojina ndo nge e xrakonoe a chujni ti xra xrangíxixión nunte xasintajni.

<sup>26</sup> Ko jai kainna nojna me e, ixi jitaxin xroon tsikjin sen profeta xranchi kuetuan an ndo Dio, ndo jichón kain nchakon. Kain ji in chujni nchijíi nunte xasintajni xrochuxin n̄ ko tsitikaon n̄ ko sinche e n̄ ti ndachro je e ndo.

<sup>27</sup> Jii naakua ndo Dio, ndo no e kain nge e, ko je o je e ndo tikinixin en ndo kain juasaya ixi juachaxien Ncháina Jesucristo. Jaña tson en.

**Chijnie ndo Jesucristo  
Popoloca, San Luís Temalacayuca: Chijnie ndo  
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source files  
dated 29 Jan 2022

ee37a138-f1b9-51ef-b60f-e89d6de4d06f